

桂苑筆耕集
一



桂苑筆耕集

(一)

崔致遠著

校印桂苑筆耕集序

記有之曰。酒醴之美。而元酒明水之尙。貴五味之本也。黼黻文繡之美。而疏布之尙。反女功之始也。古之君子。必重其本始如此。吾東方之有文章。而能著書傳後者。自孤雲崔公始。吾東方之士。北學於中國。而以文聲天下者。亦自崔公始。崔公之書傳於後者。唯桂苑筆耕與中山覆簣集二部。是二書者。亦吾東方文章之本始也。吾東方以文爲尙。至我朝益煥以融。家燕許而戶曹劉。以詩若文成集者。無慮充棟宇矣。而顧鮮有知崔公之書者。余嘗見近代人所撰東國書目。有載中山覆簣集者。徧求之終不可得。唯桂苑筆耕二十卷。爲吾家先世舊藏。自童幼時。知珍而玩之。然間以語人。雖博雅能文而好古者。亦皆言未曾見。然則是書也。幾乎絕矣。使是書不行於東方。是元酒不設於太室。而疏布不羈於犧尊也。豈所以教民不忘本哉。世或謂公文皆駢儷四六。殊不類古作者。公之入中國。在唐懿僖之際。中國之文。方專事駢儷。風會所趨。固有不得而免者。然觀公所爲辭。遑遑多華而不浮。如檄黃巢書一篇。氣勁意直。絕不以雕鏤爲工。至其詩。平易近雅。尤非晚唐人所可及。是蓋以明水疏布之質。而兼有乎酒醴黼黻之美者。豈不彌可珍哉。公在中國。取科第入軍府。亦旣已聲施當時矣。而一朝去之如脫屣。及歸東方。躋翰苑。貳兵部。以至阿漭。阿漭者。新羅大官。其顯用方未已也。而顧又自放於山林寂寞之濱。以終老其身而不悔。蓋度其時之皆不可有爲也。士君子立身蹈道。莫有大乎出處之際。出處而不失其時。非賢者不能也。賢者之作。

固不可使其無傳。況其文傑然如彼。而又爲東國文章之本始者哉。湖南觀察使徐公準平。卽余所稱博雅能文而好古者也。聞余蓄是書。亟取而校之。捐其俸。搨以活字。得數十百本。用廣其傳。曰。不可使是書絕於東國也。嗚呼。不忘本始。教民厚也。表章賢人。勸民善也。徐公之用心也如此。其所以爲政於湖南者。亦可知已。役旣完。徐公屬余曰。子實傳是書。今不可以靳一言。余辭不能得。若崔公之蹟行本末。與是書之可備考證者。徐公之序詳之矣。余無所復贅云。甲午九月。大匡輔國崇祿大夫議政府左議政豐山洪奭周序。

校印桂苑筆耕集序

桂苑筆耕集二十卷。新羅孤雲崔公。在唐淮南幕府時。公私應酬之作。而東還之後。手編表進於朝者也。公名致遠。字海夫。孤雲其號也。湖南之沃溝人。幼穎慧絕倫。年十二。從商舶入中原。十八舉進士第。久之。調溧水縣尉。任滿而罷。時值黃巢之亂。諸道行營都統高駢。開府淮南。辟公爲都統巡官。凡表狀文告。皆出公手。其討黃巢檄。天下傳誦。奏除殿中侍御史。賜緋魚袋。後四年。充國信使東歸。事憲康王。定康王爲翰林學士。兵部侍郎。出爲武城太守。眞聖時。挈家入江陽郡。伽倻山以終焉。葬在湖西之鴻山。或謂公羽化者。妄也。夫以海隅偏壤之產。而弱齡北學。取科宦如拾芥。終以文章鳴一世。同時賓貢之流。莫之或先。豈不誠豪傑之士哉。若其居幕數載。知高駢之不足有爲。呂用之諸葛殷等之誕妄必敗。超然引去。去三年而淮南亂作。則又有似乎知幾明哲之君子。其人與文。要之可傳。不可泯者也。據進表是集之外。復有今體賦一卷。今體詩一卷。雜詩賦一卷。中山覆篋集五卷。唐藝文志。則稱桂苑筆耕二十卷。文集十卷。而他皆不傳。唯是集屢經鐫印。板刻舊佚。搨本亦絕罕。癸巳秋。余按察湖南。巡到武城。謁公書院。裴徊乎石龜流觴臺之間。俛仰遺躅。有餘慨焉。會淵泉洪公。以是集寄曰。此近千年不絕如綫之文獻耳。子其無流通古書之思乎。余如獲拱璧。懼其愈遠而愈佚也。亟加證校。用聚珍字擺印。分藏諸泰仁縣之武城書院。陝川郡之伽倻寺。嗟乎名醞之坊。必題杜康。良劍之鏗。必標歐冶。爲其不忘本始也。我東詩文集之祇今

傳者。不得不以是集爲開山鼻祖。是亦東方藝苑之本始也。庸詎可一任其銷沉殘滅。而不之圖哉。東還後。著作散逸無傳。唯有梵宮祠墓之間。披林藪。剔苔蘚。尙可得十數篇。彙附原集。剗剗壽傳。余竊有志而未遑云。按史稱中和二年正月。王鐸代高駢爲諸道行營都統。五月。加高駢侍中。罷鹽鐵轉運使。駢旣失兵柄。復解利權。攘袂大詬。上表自訴。言辭不遜。上命鄭畋草詔切責之。今考集中。有謝加侍中表。巽辭引咎而已。無一語激忿勃謾。又有謝賜宣慰表云。仰睹綸音。深嘉師徒輯睦。黎庶安寧。其假借慰獎也。若是之慙摯。史所謂草詔切責者。無乃非當時實錄也歟。又按中和紀年。止於四年。而公進表年月。系以中和六年。蓋公以中和四年十月浮海。翌年春始抵國。又翌年編進是集。而前一年之改元光啓。容或未聞知也。

歲在闕逢敦牂中元。達城徐有樂。書於湖南布政司之觀風軒中。

桂苑筆耕序錄

淮南入本國兼送詔書等使。前都統巡官承務郎侍御史內供奉賜紫金魚袋臣崔致遠進所著雜詩賦及表奏集二十八卷具錄如後。

私試今體賦五首一卷

五言七言今體詩共一百首一卷

雜詩賦共三十首一卷

中山覆簣集一部五卷

桂苑筆耕集一部二十卷

右臣自年十二離家西泛。當乘桴之際。亡父誠之曰。十年不第進士。則勿謂吾兒。吾亦不謂有兒。往矣。勤哉。無墮乃力。臣佩服嚴訓。不敢引忘。懸刺無遑。冀諸養志。實得八百之已千之。觀光六年。金名榜尾。此時諷詠情性。寓物名篇。曰賦曰詩。幾溢箱篋。但以童子篆刻。壯夫所慙。及忝得魚。皆爲棄物。尋以浪跡東都。筆作飯囊。遂有賦五首。詩一百首。雜詩賦三十首。共成三篇。爾後調授宣州溧水縣尉。祿厚官閑。飽食終日。仕優則學。免擲寸陰。公私所爲。有集五卷。益勵爲山之志。爰標覆簣之名。地號中山。遂冠其首。及罷微秩。從職淮南。蒙高侍中專委筆硯。軍書輻至。竭力抵當。四年用心。萬有餘首。然洵之汰之。十無一二。敢比

披沙見寶。粗勝毀瓦畫墁。遂勒成桂苑集二十卷。臣適當亂離。寓食戎幕。所謂饘於是。粥於是。輒以筆耕爲目。仍以王詔之語。前事可憑。雖則僂僂言歸。有慙鳬雀。旣墾旣耨。用破情田。自惜微勞。冀達聖鑑。其詩賦表狀等集二十八卷。隨狀奉進。謹進。

中和六年正月日前都統巡官承務郎侍御史內供奉賜紫金魚袋臣崔致遠狀奏

桂苑筆耕集一部二十卷

都統巡官侍御史內供奉崔致遠撰

桂苑筆耕集卷一

唐高麗都統巡官侍御史內供奉崔致遠撰

表一十首

賀改年號表

賀通和南蠻表

賀建王除魏博表

賀封公主表

賀殺戮黃巢徒伴表

賀處斬草賊阡能表

賀收復京闕表

賀殺黃巢表

賀降德音表

賀迴駕日不許進歌樂表

賀改年號表

臣某言。今月某日。得進奏院狀報。奉十一日宣下。改廣明元年。爲中和元年者。展義龜城。易名鳳紀。美號既新於歷象。歡聲遍振於寰區。臣某誠抃誠躍。頓首頓首。臣謹案王制云。天子西巡狩。命典禮。考時月。定日同律。然則三秋啓候。萬乘省方。金郊興肅殺之風。玉壘應巡遊之地。遂遵規於舉正。爰降命於改元。且大戴禮曰。中也者。天下之大本。和也者。天下之達道。致中和。天地位焉。萬物育焉。故漢益州刺史王襄。俾蜀詞人王褒。作中和樂職宣布之詩。以歌君德。耆舊傳。楊況及聖朝。曾編新樂。舉二月恬和之節。播八風調暢之音。永驗休譚。實諧昌運。伏惟聖神聰睿。仁哲明孝。皇帝陛下。纂承寶位。丕闡皇猷。將務格苗。暫勞避狄。風始行於地上。易象可徵。日再耀於天中。休禎斯在。是以紀年有裕。懸法無虧。帝業中興。則遠超於前漢。後漢。物情允洽。則近繼於元。和太和。足可使蠡植昭蘇。華夷悅服。掩神雀黃龍之瑞。應河清海晏之期。則彼蕞爾叛徒。騷然嘯聚。偶縱煙塵之患。卽歸原野之誅。佇迴西幸之儀。便舉東封之禮。臣今者既獲成師以出。必能仗義而行。跡泛戈船。心馳劍閣。冀陳戎捷。永賀堯年。臨楚水以魂飛。朝天可待。望秦雲而目極。捧日爲期。未獲榮列朝班。稱慶行在。無任抃躍戰懼屏營之至。謹奉表陳賀以聞。臣某誠歡誠喜。頓首頓首。謹言。

賀通和南蠻表

臣某言。臣得進奏院狀報。入南蠻通和使劉光裕等。迴雲南通和。兼進獻國信金銀器物。匹段香藥馬等者。天威遠振。星使遄歸。化外癡內黠之徒。竭奉贊獻琛之禮。德既超於萬古。恩已洽於四夷。臣某誠欣誠

抃頓首頓首。伏以聖主卜征。旣以用和爲貴。遠人從化。自知犯義不祥。是得事尙從權。德資含垢。言皆答響。禮不違經。且南蠻嘗懷異謀。久稔邊患。數年猾夏。獨虧控北之誠。列鎮徵兵。驟動征南之役。則築虛可慮。怙亂難防。今者鳳口銜書。纔飛遠地。狼心感德。永順皇風。有以見皇帝陛下法古爲君。視人如子。以藏疾匿瑕爲妙策。以玩兵黷武爲良箴。能昭利害之鄉。不失羈縻之道。遂使要服修貢。賓旅歸仁。適當多事之秋。已見太平之兆。則彼驃信實狗封之族。尙革昏迷。賊巢迺蟻聚之羣。何難撲滅。佇聆大捷。永賀中興。必可驅堯舜而殿禹湯。苑五岳而池四海。盛矣美矣。念茲在茲。臣頃者禦寇交州。董戎蜀郡。先則展馬援討除之勢。後乃設隨何說諭之機。仰托皇威。粗申將略。喜當今日。免負初心。限守藩條。不獲稱慶行在。無任賀聖戀恩。欣躍屏營之至。謹奉表陳賀以聞。臣某誠抃誠躍。頓首頓首。謹言。

賀建王除魏博表

臣某言。臣得進奏院狀報。二月二十二日。恩除建王。可開府儀同三司。兼太保。充魏博節度使者。維城茂德。列士殊勞。逮分閫外之憂。實表寰中之慶。臣某誠歡誠喜。頓首頓首。臣聆周歌麟趾。漢譬犬牙。固須地處親賢。方得天垂寵寄。伏以建王修善爲樂。居高不危。好書而旣擅多才。獻表而肯慙求試。今以鄴稱上鎮。魏有大名。將資磐石之宗。遂錫分圭之寵。豈獨漳濱之俗。遠荷恩威。永命海內之人。皆歌德業。臣限守藩鎮。不獲稱慶行在。無任踴躍屏營之至。謹奉表陳賀以聞。臣某誠欣誠躍。頓首頓首。謹言。

賀封公主表

臣某言。臣得進奏院狀報。奉去年十月十四日勅旨。皇帝第十一妹。封遂寧公主。長女封唐興公主。次女封永平公主。待收復京闕。備禮冊命者。芳舒玉葉。寵襲金根。鬱佳氣於高天。振歡聲於率土。臣某誠欣誠抃。頓首頓首。伏以遂寧公主。德資元吉。考祥於歸妹之占。唐興公主。永平公主。譽治肅雍。稟慶於降嬪之典。伴嫦娥於獨月。分嫫女於雙星。秀發青春。光浮碧落。伏惟皇帝陛下。齊家理國。恭己敬親。流鳳辰之殊恩。舉鸞閨之美命。猶以暫勞仙蹕。未復皇都。留具禮於宮闈。待成功於干羽。捧日而榮滋九族。欽風而喜播四方。臣限守藩條。不獲陪位稱慶。行在無任抃蹈聳踊之至。謹奉表陳賀以聞。臣某誠喜誠躍。頓首頓首。謹言。

賀殺黃巢徒伴表

臣某言。臣得進奏院狀報。北路軍前定難軍節度使。拓跋思恭。保大軍節度使。東方達等。奏宣君縣南殺戮逆賊黃巢徒伴二萬餘人。生擒三千人。並賊將者。又鳳翔節度使李昌言奏。探知京中賊徒潰散。六月十三日。皇帝御宣政殿。排仗受宰臣及百僚賀禮畢者。睿謀遠叶。戎捷遄陳。開雉扇而儼皇威。舉鸞旌而恭列辟。天浮喜氣。地匝歡聲。臣某誠喜誠抃。頓首頓首。伏以逆賊黃巢。嘯聚兇狂。偷生晷刻。養姦而惟日不足。恃暴而謂天可欺。敢驅螻蟻之羣。累拒熊羆之衆。孽唯自作。罪欲何逃。拓跋思恭。東方達等。身居重位。手握雄師。氣吞蠹彼之徒。志解赫斯之怒。齊驅於六步七步。果剗於左之右之。戰於野而騰威。戎難伏莽。拘諸原而騁勇。勢若焚枯。不唯剝面舂喉。乃得連頭係頸。況李昌言鎮於岐下。伺彼京中。識虞譚鸞集。

之祥。辯師曠鳥聲之樂。遂飛吉語。遠達宸聰。佇看大戮之期。克踐中興之運。伏惟聖神聰睿仁哲明孝皇帝陛下。財成三極。敦敍九疇。出震位而臨人。方瞻堯日。幸坤維而罪己。更闡舜風。暫勞遵養之師。遙委仁賢之將。旣誅逆黨。爰列賀班。濯錦江邊。已睹霞舒綵仗。蒼龍闕下。卽聆雷振鑾音。永清四海之波。遍灑九天之澤。臣謬操鈇鉞。尙默鼓鼙。未唱凱歌。唯知拊舞。顧彭野之久妨道路。怒髮雖衝。望秦原而將滅煙塵。愁眉已展。臣限拘守鎮。不獲稱慶行在。無任欣抃。踴躍屏營之至。謹奉表陳賀以聞。臣某誠歡誠躍。頓首頓首。謹言。

賀處斬草賊阡能表

臣某言。得進奏院狀報。西川都將高仁厚部領兵馬。收捉草賊阡能。已於十月十八日。並處置訖。二十一日。聖駕出羅城北樓。宣慰迴戈將士。各賜優賞。放歸本營者。遠耀日旗。高張天網。梟帥已歸於大戮。鴻圖永耀於中興。臣某誠歡誠抃。頓首頓首。臣伏以草賊阡能。跡陷迷津。心辜聖澤。短狐稔射人之毒。瘕狗喧吠主之聲。高仁厚遂惡志雄。擒奸氣勇。仰資睿略。靜剋兇徒。伏惟皇帝陛下。有罪必誅。無思不服。歌採薇而遣卒。念破竹之成功。親降如綸之言。遍安被練之卒。妖氛息而綿山益翠。喜氣浮而錦水先春。自此遠振軍聲。深摧寇黨。覆頑巢而在卽。迴法駕以何遙。臣方事專征。先聆吉語。限拘藩鎮。不獲稱慶行在。無任踴躍屏營之至。謹奉表陳賀以聞。臣某誠歡誠喜。頓首頓首。謹言。

賀收復京闕表

臣某言。臣得河中節度使王重榮牒報。四月十日。常道與雁門節度使李克用及都監楊復光。下諸都馬軍。齊入京城。與賊交戰。約殺卻賊步軍一萬餘人。其馬軍賊。硬走出城。往東南路去。其賊軍家口錢帛。並皆遺下。黃巢亦未知存亡。其逃遁賊徒。尋差兵馬追奔。並已收復京闕。訖者。天威耀武。月捷傳聲。望宸階而初奏凱歌。舉區宇而咸增抃舞。臣某誠喜誠躍。頓首頓首。臣竊窺曩代。旁採前經。靜理邦家。必須以殺止殺。保安社稷。固在雖休勿休。是故不得已而用兵。無所私而煦物。伏惟皇帝陛下。纂臨寶位。不闡宏圖。匪四溟而不見揚波。安九野而皆能偃草。而乃逆賊黃巢。暗遵邪徑。深入禍門。久騰吠噪之聲。敢恣穿窬之便。穢黷宮闕。淹延歲時。偷安暫戲於鼎中。戮暴難逃於机上。今者風行睿略。雨集王師。楊復光任在信臣。李克用名爲勇將。各思報効。競奮驍雄。齊心而覆滅梟巢。戮力而剋收鳳里。賊巢拒輪不暇。亂轍潛奔。干戈則電散風飛。金帛則填街塞巷。更展追遊之勢。必擒稔惡之徒。自此日月重光。煙塵永息。唯望宸遊之返駕。佇觀盛禮於登封。臣職忝董戎。功慙徇難。雖手無重柄。數年虧奮擊之能。而耳得嘉聲。遠地倍歡呼之切。臣限拘藩鎮。不獲稱賀行在。無任手舞足蹈慶抃屏營之至。謹奉表陳賀以聞。臣某誠喜誠躍。頓首頓首。謹言。

賀殺黃巢表

臣某言。臣得武寧節度使時溥狀報。逆賊黃巢尙讓分隊。並在東北界。於六月十五日。行營都將李師悅。陳景瑜等。於萊蕪縣北。大滅羣兇。至十七日。遂被賊將僞僕射林言。梟斬黃巢首級。並將徒伴降部下都。

將李惟政田球等訖其黃巢函首已送行在者聖日重耀狂氛暗銷戎捷超於古今歡聲振於夷夏臣某誠抃誠躍頓首頓首臣伏以歲有四時則秋行肅殺之令武有七德則兵貴禁戢之能是故歲以無相奪而克成兵所不得已而方用自革結繩之政皆勞祝網之仁賊巢食土懷頑含沙稔毒深犯天紀廣缺地災九州則半致侵凌三輔則久經穢黷擢髮而旣難數罪吞喉而只待懲姦今者窮寇迴心元兇授首殺傷老少歸附居多有征無戰之言實符王道以靜待勞之勢深叶軍機伏惟皇帝陛下運啓中興功資下武睹天鑑而實爲大警聽風謠而非只少康永當銷干戈之鋒便可鑄耒耜之器況迺西山八國數年飽巡幸之恩東岳百神終日渴登封之禮佇迎雲馭俯納巖音臣密邇寇戎撫安疆境不暇爭鋒而進實防代俎之譏慙虧犬馬之勞喜睹鯨鯢之戮手舞足蹈魂飛膽揚臣限守藩條不獲奔走稱賀行在無任慶抃兢越之至謹奉表陳賀以聞臣某誠歡誠喜頓首頓首謹言

賀降德音表

臣某言臣得奏院狀報司天臺奏六月十六日夜太陰虧伏奉六月二十三日德音應三川管内見禁囚徒等宜委所在長吏五日內疎理決遣其京畿四面暴露骸骨宜委諸鎮切准前後勅旨差人收拾埋瘞者望舒匿影曲赦流恩化洽泣辜義資掩骼振歡聲於蜀壘蕩妖氛於秦川臣某誠抃誠躍頓首頓首臣伏以日能順晷而照臨不失其所月以順時而盈缺則維其當況當冀葉初凋桂輪自減兵銷下土非石麟暗闕於東陵謫見上天致玉兔暫虧於西汜既同君子之過乃軫聖人之憂伏惟聖神聰睿仁哲明

孝皇帝陛下。光闡睿圖。保寧區宇。仁能及遠。德以勝妖。爰當展義之辰。克舉眚災之典。慈傷痍死。牢囚免滯。於風霜。義貫幽魂。道殣皆沾。於雨露。可使涪水耀千年之色。巴山呼萬歲之聲。道能繼於垂衣。法無妨於委轡。佇迴巡幸。仰賀登封。臣限守戎藩。不獲稱賀行在。無任抃躍屏營之至。謹奉表陳賀以聞。臣某誠歡誠喜。頓首頓首。謹言。

賀迴駕日不許進歌樂表

臣某言。臣得進奏院狀報。伏審勅旨。迴駕日。應沿路州縣。切不得輒進歌樂。及屠殺者。聲除飾喜。味減薦珍。遠遵罪己之言。深播好生之德。凡於蠢動。孰不歡呼。臣某誠抃誠躍。頓首頓首。伏惟皇帝陛下。日月運行。雷雨作解。體堯舜之理。能咸若。法禹湯之興。必勃焉。退庭舞而撤宮懸。惡衣服而菲飲食。一慈二儉。守元祖之格言。沐雨櫛風。稟太宗之不訓。今則冕旒東顧。桂枒西移。師乙收心。無以逞鏗鉤之曲。庖丁斂手。何由挫觥觶之形。義感六牲。恩加萬姓。則乃蜀山力士。旣無煩役之虞。漢水老人。豈有深譏之事。帝業永資於下武。物情皆慶於中興。臣方擁戎旃。阻隨仙蹕。遙思盛禮。空馳拱北之誠。頗報深恩。但勵鎮南之志。無任抃躍屏營之至。謹奉表陳賀以聞。臣某誠歡誠喜。頓首頓首。謹言。

桂苑筆耕集卷二

謝加太尉表

謝示南蠻通和事宜表

謝立西川築城碑表

謝賜御製眞贊表

謝御札衣襟並國信表

謝就加侍中表

謝賜宣慰兼加侍中實封表

請巡幸江淮表

請巡幸第二表

讓官請致仕表

謝加太尉表

臣某言。今月某日。宣慰使供奉官嚴遵美至。奉宣聖旨。慰諭臣及將校等。並賜臣勅書手詔各一封。加臣檢校太尉。依前充淮南節度使。兼東面都統者。仰窺鳳詔。謂對龍顏。寵榮極而何力負山。戰灼深而自容。

無地。臣某誠抃誠感。頓首頓首。臣伏以大司馬之威權。百官所仰。上將軍之法令。十道皆遵。豈唯整戢五兵。實在諧和七政。況當今日。宜屬全材。如臣者。德乏潤身。智虧周物。於儒則筆慙五色。在武則劍敵一夫。但以荷寵天庭。分憂水國。擁旌重寄。榮冠絕於一時。仗鉞專征。翼折衝於萬里。幸逢聖鑑。得盡忠誠。今者已率雄師。將誅巨猾。征旗指路。遠趨堯日之光。戰艦凌波。方託舜風之力。豈期王人遠降。帝命俄臨。獎其外鎮之微勞。授以上司之劇任。未著緇衣之美。旋叨錦被之榮。況乃兼制利權。廣潤軍食。瑞節不移於南。亮兵符亦綰於東陲。將何異能。勝此寵寄。謹當冰爲夕飯。藥作朝餐。褰帷則面撫烝黎。建旆則身先士卒。羣寇旣蝟毛而起。偶恣倂張。諸侯必馬首是瞻。共成翦滅。唯力斯視。何心自安。必也臨亂忘身。見危致命。仰解焦勞之念。粗申式遏之功。臣旣當下瀨屯師。佇欲中流設誓。枕雕戈而輟寐。跡寄轅門。瞻帝座以馳誠。魂飛輦路。未獲稱謝行在。無任感恩戀聖。榮抃戰懼之至。謹因宣慰使嚴遵美迴。附表陳謝以聞。臣某誠感誠懼。頓首頓首。謹言。

謝示南蠻通和事宜表

臣某言。二月二十六日。宣慰使供奉官李從孟至。伏奉勅旨。入鶴拓使冑嗣王龜年。閤門使劉光裕等迴。得驃信表。並國信。兼布燮楊奇肱與西川節度使書。皆備述情誠。無不順命。其表及書白。並答信物數。並令錄往。此事首末。自卿良謀者。遠降王言。深窺使節。跪閱上天之旨。坐知外域之心。寵飾踰涯。憂惶若厲。臣某誠抃誠躍。頓首頓首。臣才非問代。智不濟時。但以每鎮窮邊。粗安荒服。免使飽飛餓附。欲令前倨後。

恭頌者忝守成都。冀申遠略。遂憑釋子。善諭蒙王。仰稟天威。得揚風教。永戢干戈之患。俾陳玉帛之儀。雖羣議沸騰。競銜鑠金之口。而宸衷剴斷。早推匪石之心。是以暫事西巡。或虞南叛。爰遣維城貴冑。直閣近臣。迴聖德以降尊。遠傳元化。譯訛言而獻款。備寫真誠。既令抱義戴仁。果見奉琛執贄。此皆陛下威德。臣何力之有焉。而迺謂臣有先見之能。知未來之事。設和蠻之良策。備幸蜀之嚴城。俯錄勤勞。迴垂稱獎。睹雕題之章奏。書軌既同。息猾夏之猜嫌。梯航相接。驗南琛之贖咎。知北極之紓憂。雖云五利有餘。敢希茂賞。唯願四方無事。永贊昌期。臣限守藩條。不獲稱謝。行在無任欣躍。感戴兢惕之至。謹因供奉官李從孟迴附表陳謝以聞。臣某誠惶誠恐頓首頓首謹言。

謝立西川築城碑表

臣某言。伏奉十一月六日勅旨。以臣在任西川節度使日。創築羅城。昨因有勅嘉獎。方進所賜碑詞。今已付所司鐫寫建立者。一片石文。龜初戴立。九重天語。鳳已銜來。雕銘莫繼於色絲。寵飾遽超於華袞。仰窺恩獎。俯抱憂惶。臣某誠感誠懼。頓首頓首。頃者幸夢三刀。久臨益部。遙提一劍。得挫蒙兵。但以其玉壘可稱。金城未設。山口則空吞蠻蜚。水頭則斜枕牂牁。含溪抱谷之形。雖云天險。比屋連甍之勢。實類野居。臣是以運度籌謀。斟量板築。蓋從人欲。果致子來。遂得役興而草偃。川中誠感而土生。石上長圍於三十六里。高鎮於百千萬年。不愧鐵名。可將錐試。隼墉烏堞。儼若騫飛。錦浪綿峯。迴然裝飾。遂蒙陛下辱褒稱之重。許刊勒之榮。以爲事實可觀。足得詞華不朽。臣雖遇泥封激賞。豈將油素矜誇。非敢彰謙。所期避謗。今

者伏遇皇帝陛下。遠巡勝槩。親覽微功。徵舊賜之碑詞。命新鐫之筆跡。永使卓立琴臺之境。平欺劍閣之銘。且杜元凱之岷亭。無非自銜。阮德規之齊國。蓋是衆成。謾傳身後之虛名。豈睹目前之盛事。曷若彩毫見獎。翠琰斯刊。因成下土之功。終應上天之意。得逢今日。別振孤風。向非陛下錄善恩深。酬勞德厚。則何以未有出師之業。篆刻叨榮。曾無興學之規。傳揚竊美。臣限拘鎮守。不獲稱謝行在。無任感戴欣躍戰懼之至。謹奉表陳謝以聞。臣某誠惶誠恐。頓首頓首。謹言。

謝賜御製眞贊表

臣某言。二月二十六日。宣慰使供奉官李從孟至。伏奉勅旨。已令於大慈寺御眞院寫朕眞。並扈從宰臣等眞。列卿儀貌。俱會此堂。今先寄卿眞軸。並朕親製贊述。賜卿冀表顯恩。式彰異禮者。銀璫降使。玉簡傳詞。受宣而頂踵光輝。拜賜而神魂驚越。臣某誠感誠懼。頓首頓首。臣志欽渭訣。業鍊圯書。敢憑涓滴之勞。自安寵寄。願掃氛霧之患。永竭忠誠。遂在先朝。便從戎役。南征北伐。豈暇寧居。東鎮西藩。累叨重任。遇陛下龍飛之後。委微臣隼擊之能。蜀國防蠻。則粗申遠略。楚宮捍寇。則偶逢良機。旋令移節於海門。復許建牙於淮甸。是以常拘戎閫。未覲宸階。唯披天上之詔書。似睹日中之王字。空增戀闕。莫遂歸期。項者虔託仁祠。寫留屢質。豈致去思於舊鎮。唯慙取笑於空門。伏遇陛下。展義陳詩。停鑾駐蹕。遂徵繪事。俾寫聖容。其於侍從之臣。宜居左右。豈料屏微之質。得潤丹青。愧無燕領之姿。永侍龍顏之側。況蒙宸襟顧矚。御筆贊揚。高題而素壁爭輝。卓立而浮埃不染。然後遠飛龍詔。特遣貴臣。乍捧綵牋。驟竊游揚之譽。初開寶軸。

深驚刻畫之恩。窺看而形影自慙。感激而肺腸何極。昔漢朝中興聖帝。下念功臣。列形像於禁宮。載勳名於史筆。雖令贊述。不自稱揚。豈如陛下。暫事巡游。迴垂獎飾。別降絲綸之命。親編錦繡之詞。俾臣位掛於鳳凰池中。名超於麒麟閣上。遐尋故實。獨荷殊榮。有何出衆之能。見此非常之寵。所謂千年嘉遇。萬代美譚。唯當志勵風霜。永驗松筠之不改。身霑雨露。免憂蒲柳之先衰。臣限守藩條。不獲稱謝行在。無任感恩戀聖。榮耀兢懼之至。謹因供奉官李從孟迴。附表陳謝以聞。臣某誠惶誠恐。頓首頓首。謹言。

謝御札衣襟並國信表

臣某言。二月二十六日。宣慰使李從孟至。伏蒙聖恩。別賜臣御札衣襟。並御服衫一領。龍腦香一金合。金釵花散梳一口。金花銀盞一隻者。缺窺神筆。恩襲御衣。仙香氣撲於鼻根。寶器光騰於眼界。仰霑寵錫。俯積憂兢。臣某誠感誠懼。頓首頓首。臣每念業紹弓裘。任叨斧鉞。誓傾忠節。終報聖朝。去年親率驍雄。願殲兇醜。旋承綸旨。已駐舟師。旣慙叩楫之言。徒切枕戈之望。豈期貂冠傳命。龍袞裁書。辱宣尼一字之褒。過光武十行之詔。加以粉分御筥。香滿雕奩。花錐乃麗水之珍。雪缺透任山之器。捧玩而實驚寮吏。緘藏而永耀子孫。雖有幸逢時。輝榮驟集。而無功受賞。愧恥難居。徒荷鴻私。何申豹略。身依楚水。未陳告捷之書。目斷蜀天。但灑感恩之淚。臣限守藩鎮。不獲稱謝行在。無任荷戴激切。榮抃兢懼之至。謹因供奉官李從孟迴。附表陳謝以聞。臣某誠惶誠恐。頓首頓首。謹言。

謝就加侍中表

臣某言。臣伏奉去年十一月十一日。恩制加授臣侍中。依前淮南節度使。階勳封並如故。仍加食實封一百戶者。有命自天。處身無地。感深以泣。寵極而驚。臣誠忝誠懼。頓首頓首。伏以黜陟分科。聖君至教。行藏守道。達士良規。慮受爵以斯亡。在持盈而不殆。臣自提權筦。便遇兵戈。郡邑爲征戰之場。山海足逋逃之藪。旣難聚利。莫遂成功。況乃權有他門。刃無餘地。動見越庖代俎。無非避柱觸楹。途虧漕輓之程。僅壞銅鹽之法。伏蒙皇帝陛下。俯詳直道。不寘嚴誅。選用良才。改移重務。而乃察臣在公之節。念臣戀主之誠。重委將壇。更增封邑。恕乏一時之秀。許攀七葉之榮。唯慮慙卿。或譏竊位。然臣今所以自賀者。三朝獨立。七鎮榮遷。每當拜爵王庭。不省謝恩私室。以茲勵己。永免愧人。謹當激發壯圖。殲夷窮寇。粗息四方之患。仰寬萬乘之憂。臣限守藩條。不獲稱謝行在。感恩戰灼。屏營之至。謹奉表陳謝以聞。臣某誠慙誠懼。頓首頓首。謹言。

謝賜宣慰兼加侍中實封表

臣某言。六月十六日。供奉官劉叔齊至。奉宣聖旨。慰諭臣及將校。並賜臣勅書手詔各一封。官告一通。就加臣侍中。仍加食實封一百戶。餘如故者。自天降命。無地安身。啓鳳詔而魂驚。對貂冠而股慄。臣某誠感誠懼。頓首頓首。臣早因薄效。每忝殊榮。勤王而素乏實勤。受爵而但多虛受。負山寡力。臨谷戒心。況自我馬生郊。陣蛇出穴。妖氛蔽闕。法駕省方。臣久鎮雄藩。嘗提重柄。一無成績。兩拜寵章。前者以上將軍爲大司馬。今則兼納言之任。加真食之榮。累年虧橫草之功。終日抱伐檀之恥。且易曰。或錫鞶帶。終朝三褫之。

詩云。受爵不讓。至於已斯亡。遍覽格言。是懲貪祿。不能報國。苟欲榮家。臣實何心。有覲於目。但遇王人遠降。聖澤傍流。仰睹綸音。深嘉稅政。以爲師徒輯睦。黎庶安寧。俯念忠誠。特行懋賞。臣也方寸之地。可倚咫尺之顏。不違。豈敢矯俗陳情。飾詞讓爵。難效一辭而退。唯期三命益恭。既除勞力於利權。終願勵心於闔寄。臣伏限守藩。不獲奔赴。行在稱謝。無任感恩戀聖。戰汗屏營之至。謹附供奉官劉叔齊奉表陳謝以聞。臣某誠惶誠戀頓首頓首謹言。

請巡幸江淮表

臣某言。伏以舜伐有苗。修德而終能率服。湯征自葛。行恩而競望來蘇。斯皆今古之美譚。實乃帝王之盛事。固敢跼天負責。向日裁誠。仰陳利害之端。冀副華夷之望。不量狂瞽。遠黷聖聰。臣某誠惶誠懼。頓首頓首。臣聞日月以運行為德。永麗於天。江河以委輸是期。必朝於海。上能昭其煦育。下方遂於通流。況乃天災非人力能除。地分有兵戎不起。將獻永安之兆。輒陳可復之詞。伏自寇陷上京。兵徵外鎮。猛銳始從於鶴列。旋致徒歸。頑兇尙固於蟻封。難成盡殲。臣豈唯投袂實至衝冠。昨率舟師。暫屯江次。必欲朝離楚岸。暮及漢濱。旗張商嶺之風。劍拂秦川之霧。願言薄伐。冀效微勞。尋蒙陛下遠許分憂。不令離任。臣進退惟命。始終無虧。寧招曠職之譏。敢涉爭功之責。又緣淮海。乍息煙塵。忽若去兵。必當致寇。則迺江南沃壤。盡成蠶食之資。淮北強鄰。暗展鯨吞之勢。輿賦既無所倚。軍須將必屢空。是以仰奉勅書。已班師旅。四境之赤眉歸伏。八州之黔首謐寧。遍布皇恩。粗申將略。然而關中縱敵。闔外儉安。既乖踊躍以身先。每切忸怩。

於顏厚。伏惟皇帝陛下。省方展義。駐蹕經時。龜城壯麗之形。金湯雖固。鳳輦巡游之費。桂玉可虞。況舊謂西川富彊。祇因北路商旅。託其茶利。贍彼軍儲。今則諸道發表章。則半載始迴。徵貢獻。則經年未達。實緣道路遼遠。兼值干戈阻驢。值剽掠者斯多。至行朝者甚少。加以僦僱所費。耗蠹不輕。每當水運陸般。只可率鍾致石。以此征稅。則漸成抗弊。軍兵則未遂飫饒。伏慮扈從實繁。宴犒仍廣。盡搜資於三蜀。難濟用於百司。苟興盱食之憂。實懷庶寮之望。又以蜀川僻居。荆棘。缺人密邇。蠻戎。虺毒。潛吹獸心。難測。儻或乘虛犯境。率衆渡瀘。六軍之熊豹騰威。縱能制敵。八詔之豺狼作暴。不免喧驚。事可酌於將來。禍須防於未兆。伏惟陛下。覽臣忠懇。察臣直言。暫迴西幸之儀。更舉南巡之禮。使處處息後予之怨。人人安戀主之心。天下幸甚。天下幸甚。且如遠狩河陽。僞遊雲夢。將興霸王。俯順權宜。況江淮爲富庶之鄉。吳楚乃繁華之地。陛下九年理國。四海爲家。豈比周之東遷。非擬晉之南渡。賊巢兇狂。久聚穢黷。難除。縱便收城。未宜迴駕。豈如揚都奧壤。桂苑名區。四夷之賓。易朝天。九牧之貢。無虛月。伏乞陛下。俯迴鳳辰。略泛龍舟。必想山靈卷三峽之風。水伯寢九江之浪。遐尋禹跡。允叶堯巡。昔也日耀錦川。天不傾於西北。今則風行澤國。地無缺於東南。然後發使清宮。舉章司隸。振盛儀於歸闕。告休績於登封。臣雖識昧變通。而志勤匡濟。敢憑草奏。輒貢管窺。無任戀聖感恩。戰越屏營之至。謹奉表陳請以聞。臣某誠惶誠懼。頓首頓首。謹言。

請巡幸第二表

臣某言。聞聖人能以天下爲一家。以中國爲一人者。必聞於其義。達於其患。然後能爲之。臣遂自前年。繼

陳短識。請移軍駕。巡幸江淮。計資於避險就安。事叶於暫勞永樂。未遇聖鑑。再獻瞽言。臣某誠慙誠懼。頓首頓首。臣尙阻擒奸。敢言伐善。然但願愚夫之一得。難追賢者之三思。臣頃鎮成都。偶諧遠慮。克符天意。亟就土功。別營雉堞之雄規。永壯龜城之峻境。爰憑釋子。善誘蒙王。果悛倔彊之愆。便付懷柔之信。皆資帝力。能肅物心。伏遇陛下。遠耀珠旗。高臨玉壘。樂降絲綸之旨。深嘉毫髮之勞。請臣有先見之機。念臣以至誠所感。仰銜睿獎。倍激忠誠。然則當年已往之功。粗成籌畫。今日未來之事。竊有管窺。苟或緘辭。則爲負德。不辭鼎鑊。輒貢芻蕘。臣近者俯察時情。仰瞻乾象。荊州道路。羣寇將侵。蜀國封疆。微灾似起。儻或未收。鳳闕尙駐。鸞輿忽有妖氛。潛興近境。必恐烏合蠶食之徒。占據江陵。把斷峽路。則列鎮貢賦。無計流通。行在詔書。亦難傳降。若見東西阻絕。固當遐邇動搖。伏惟陛下。斷自宸衷。斥其橫議。念江淮之進獻。遠涉多虞。察蠻蜚之奸兇。乘虛可懼。早移仙蹕。直幸楊都。滅星辰交錯之灾。叶日月運行之理。則乃九州斧鉞。討戎而齊。願風驅四海。梯航奉贄。而必能雲集。盛矣美矣。念茲在茲。且逆賊黃巢。久黷皇居。多成穢跡。直到剋收之後。須勞繕葺之功。更俟二三年之間。可興千萬世之業。慮不先定。事難速成。伏乞陛下。覽竭節之言。闡隨時之義。俯從衷懇。暫事宸游。天下幸甚。天下幸甚。臣粗識古今。略詳利害。自非徼以爲智。豈敢知而不言。謹奉表陳。請以聞。臣某誠惶誠懼。頓首頓首。謹言。

讓官請致仕表

臣言。臣伏以聖君御宇。必先塞彼倖門。良士省躬。唯慮妨其賢路。苟速官謗。是辜主恩。況臣關中無定難。

之勲。閫外乏分憂之效。強欲晏安寵祿。其如玷浼刑章。永言量力而行。固在奉身以退。既知無隱。寧避有辭。臣某誠慙誠懼。頓首頓首。臣少勵琢磨。晚師擒縱。不以一經介意。粗於三略留心。願紹家勲。免虧堂構。先皇帝念臣孤直。試以諸難。出分大將之威權。坐受上卿之爵秩。故得內稟聿修之訓。外伸式遏之能。北掃虜庭。則胡雖不敢南牧。南清獠海。則蠻獠無由北窺。及覲彤墀。暫司緹騎。俄屬齊郊聚犖。鉅野興師。臣也不才。謬膺斯任。伏遇皇帝陛下。纂臨宸極。警諭戎藩。舉旌鉞以分勞。聽鼓鼙而軫念。謂臣有戢兵之奇略。察臣立降寇之微勞。遂令位假中台。名編外相。夢想既通於鳳沼。威稜益峻於龍旌。其後瀘水波驚。蜀山霧暗。久念雕題之患。遍流黔首之災。又蒙命臣曰。俞爲帥於彼。爰遵薄伐。得解倒懸。豈敢貪天之功。願銘鐘鼎。祇能因地之利。別建溝隍。伏蒙陛下。俯獎忠誠。特行懋賞。開國授周司徒之貴。立家紹漢丞相之榮。臣此時早誠持盈。輒思請老。必願告休錦里。退隱羅浮。不料壠上耕夫。盡解揭竿斬木。草間惡子。競謀蟻聚蜂飛。當荆門失守之時。乃楚塞宿兵之際。忝趨戎旆。兼綰牢盤。僊俛而未能報恩。驅馳而何敢言病。或猘獠磨牙於原野。或鯢鯢噴毒於江湖。尋提招討之權。來撫句吳之俗。遠憑容略。深挫羣兇。洎解印海門。建牙維甸。上將軍之劇任。首冠列藩。大司馬之雄資。先沾宥禮。揣頂踵而偏濡雨露。扼咽喉而莫效涓埃。且自黃寇憑陵。翠華巡狩。仰天戮力。竊嘗服王導之言。終日痛心。何止灑袁安之淚。及至成軍已出。又緣奉詔卻迴。行藏雖順於綸詞。進退實慙於物論。遂見時溥興北林戎役。周寶致南鄰責言。玉每慮於俱焚。金亦憂於衆鑠。幸蒙陛下。涵之以海量。炤之以天光。如見肺腸。得保首領。然臣也先軫以直言逞志。曹

植以深過責躬。則二年忝都統之名。不能誅奸戮暴。四載主銅鹽之務。不能富國贍軍。是以兵權則屢見改移。利柄則變爲分割。凡此辱君之命。莫非職臣之由。臣猶自知。況在陛下。擢髮而旣難數罪。乞骸而唯願辭榮。今者大憝奔逃。上京克復。氛祲卽當殄滅。寰區永見廓清。臣有忝登壇。無能報國。行當暮齒。居亦胡顏。兼以頃鎮蠻陬。久棲瘴嶺。蒙犯其妖煙毒霧。剷除其封豕長蛇。當年而靡憚勤劬。晚歲而皆成疾疹。不將筋力爲禮。旣載前經。苟或身心自讎。難逃後患。雖思強飲。實愧素餐。廣陵爲楚澤上游。薊府乃漢朝大任。以臣衰老。當此重難。必恐終無所成。遂希不可則止。伏惟皇帝陛下。知人爲哲。多士以寧。選英才而代處是邦。俾微臣而退居散地。闕於菟之逃富。固是忠貞。壬內史之辭官。誠非矯飾。幸遇舜風無外。漢日再中。陛下旣已除盱食之憂。微臣亦希免夜行不息。臣無任望恩戀聖。懇迫兢灼之至。謹奉表陳請以聞。臣某誠感誠懼。頓首頓首。謹言。

桂苑筆耕集卷三

狀狀一十首 奏狀二
十首 堂狀一十首

謝詔狀

謝詔示權令鄭相充都統狀

謝宣慰狀

謝詔獎飾進奉狀

謝詔示徐州事宜狀

謝詔止行墨勅狀

謝鄒公甫充監軍手詔狀

謝除鍾傳充江西觀察使狀

謝就加侍中兼實封狀

謝秦彥等正授刺史狀

謝詔狀

右臣伏奉四月十日詔旨。黃巢兇逆。穢黷宮城。罪惡貫盈。人神共怒。尋東兵合勢。翦滅元兇。想副朕懷。已

遵道路。佇聞克復。永耀功名者。十行天語。萬里星飛。捧窺而壯膽。初驚。跪讀而愁眉頓豁。竊以黃巢禍心。斯極。狠力既衰。肉已太鹹。果缺將落。暫起烟塵之患。則歸原野之誅。臣每當永夜枕戈。早願中流叩楫。自啓行十乘。已屯駐五旬。伏綠江路多虞。風波未便。暫淹行色。用候良時。非致役於遷延。但興懷於瞿鑠。今則仰觀鳳銜之語。況乘隼擊之秋。俯勵軍謀。仰遵睿算。卽冀朝離江北。暮到漢南。長驅背水。師水破滔天之孽。率奮義感恩之衆。氣已凌雲。殄滅奸匿暴之徒。勢如沃雪。伏惟陛下。巡備禮時。邁傳歌。將示罪於三危。乃宣威於七德。臣遠承獎諭。誓盡勤勞。身暫寄於戈船。心每馳於劍閣。唯願西都獻捷。早申收復之微功。東嶽告成。得覩登封之盛事。臣無任感激兢懼之至。謹奉狀陳謝以聞。謹奏。

謝詔示權令鄭相充都統狀

右臣伏奉去年九月九日詔旨。卿曾問道獻章。諸鎮飛檄。便欲長驅甲馬。親議專征。未卽便來。須權制置。遂命鄭畋等。分爲京城四面都指揮。諸道師徒。慮卿偶未委知。故茲詔示者。伏以書曰。無偏無黨。王化乃興。詩云。不識不知。帝謀是稟。況兵當伐叛。事合從權。臣去年先因淮北侵疆。後值江南阻路。久屯師旅。未遂戰征。陛下妙選羣才。近分重寄。鄭畋等莫不身先貔武。手運豹韜。旣當怒髮爭衝。固爲賊智可搆。仰酬睿獎。竟勵忠誠。臣也遠鎮臨戎。強鄰結憾。唯慙曠職。豈望成功。伏蒙陛下。尙念勤勞。曲垂慰諭。覩上天之慈意。解外地之深憂。旣許將軍。獨舉柳營之令。終期叛卒。必歸竹町之誅。臣限守戎藩。不獲稱謝。行在無任感激戰懼之至。謹奉狀陳謝以聞。謹奏。

謝宣慰狀

右宣慰使供奉官李從孟至。伏奉去年九月九日勅書手詔。兼宣恩旨。慰諭臣及將士等者。伏以感恩效命。武士常規。仗順摧兇。元戎素分。賊巢偶乘奸便。尙道嚴誅。臣願膾彼逆鱗。鬱其邪膽。掃重氛於魏闕。迎法駕於蜀都。是以去年據馬援之鞍。敢矜獨勇。杖辛毗之鉞。親率諸軍。久在江干。再承天旨。不令離任。遂已班師。豈料伏蒙陛下。念及老臣。撫茲衆卒。特迂星使。遠降泥封。綸傳萬乘之言。纖微不閒。續彼百夫之體。慰暖皆均。歡呼而聲已振。雷感泣而淚將成。雨唯期勵節。共願報恩。臣限守藩條。不獲稱謝行在。臣無任感戴榮抃戰懼之至。謹因供奉官李從孟迴奉狀陳謝以聞。謹奏。

謝詔獎飾進奉狀

進奏院遞到恩賜手詔一封。

右臣伏奉詔旨。以臣先缺供軍。應接使賂潛等。進奉銀事。特賜獎飾者。伏以收功示賞。乃聖主之異恩。寓物輸誠。固藩臣之常事。但屬敵滋鄰境。寇阻道途。運綱而旣闕。先登。贊禮而僅侔。錫賁早成。缺滯。況涉渺微。是以雖憑屏水之珍。難追塗山之罪。豈料鴻毛比價。方申懇悃之心。鳳口銜書。遠降褒稱之旨。感激而懷榮爲懼。揣脩而報德何期。臣限守藩條。不獲稱謝行在。無任荷恩戀聖屏營之至。謹奉狀陳謝以聞。謹奏。

謝詔示徐州事宜狀

右臣先奉詔旨。據時溥奏。卿本道羌兵。侵境殺傷。令務止遏者。臣遂具時溥誣謗事由申奏。伏奉二月二十五日詔旨。今則寇孽不日剿降。藩方務息爭競。所宜和叶。各保封疆者。臣伏以天德既高。側管者固難窺測。日恩至廣。戴盆者自阻照臨。是以遠竭愚誠。動達聖慮。時溥既銜睿獎。得縱兵威。早成熊據之謀。更展鯨吞之勢。累興師旅。來犯封疆。焚郭邑於山陽。掠資財於淮上。臣遂令捍禦。略挫兇狂。而乃時溥奸計已成。根株巧言。頗有枝葉。不思已過。敢惑宸聰。今者再奉絲綸。仰遵徽纆。唯期寬則得衆。粗可和而不同。臣分闔無功。戢兵爲務。至於草寇。猶許歸降。況是鄰藩。豈謀侵擾。彼無此詐。此無彼虞。臣限拘鎮守。不獲稱謝。行在無任感激屏營之至。謹奉狀陳謝以聞。謹奏。

謝詔止行墨勅狀

右臣伏奉詔旨。去春權降詔命。許諸道承制除官。已兩度降勅止絕。自今後凡有要甄獎者。並於急遞奏聞。不得更議承制者。臣伏以漢朝鄧禹。始啓倖門。魏室曹瞞。敢專重柄。欲敦於自家刑國。所惜者唯器與名。伏遇陛下。遠事宸遊。慮防爵賞。遂降無私之澤。遍資諸道之權。不料人人而競弄筆端。處處而皆誇墨勅。長蛇封豕。猶匿暴於神州。狗尾羊頭。已成羣於列鎮。臣前年雖奉詔旨。未欲施行。卻緣親率軍兵。遠期征討。此時久屯南浦。將泛西江。忽被鎮海節度使周寶。欲感軍情。潛施巧計。便以無功將吏。悉皆超授官榮。臣所領士卒。既多。將校不少。彼安坐者。猶爲甄獎。此遠行者。豈免怨嗟。遞口聲傳。從頭憤激。臣若不依周寶。必恐事生。遂准詔書。得行軍賞。已曾一一具事由申奏訖。自奉前年十一月一日勅旨。仰遵成命。靜

守常規。至於近日所招賊徒。只與往時先賜官告。曾無僭越。豈可隱藏。今者外將忠誠。永當無二。大君善教。已至再三。泣告而天。何未聆。憂懷而地。謂可入。臣限拘藩鎮。不獲稱謝行在。無任戰越屏營之至。謹奉狀陳謝以聞。謹奏。

謝鄒公甫充監軍手詔狀

伏奉某月日勅書手詔各一封。

右新授當道監軍鄒公甫。四月十日到。伏蒙聖恩。賜臣勅書手詔。兼慰諭臣及將校等。九天降詔。萬里宣恩。柳營之列。將歡呼。桂苑之羣寮。感泣。伏以鄒公甫。素懷材略。久撫軍戎。漢南之職業。可觀。江北之物情。獲賴。既見寬能得衆。必令師克在和。臣仰窺五色之書。俯慰三行之士。喜氣高侵於畏日。歡聲遠振於薰風。臣與將校等。無任感恩激切。榮抃屏營之至。謹奉狀陳謝以聞。謹奏。

謝除鍾傳充江西觀察使狀

右臣先奏請授鍾傳江西觀察使。其高茂卿乞別除廉鎮。伏奉七月五日詔旨允許。特賜獎飾者。天從素望。風遞仙音。既諧舉善之誠。實叶分憂之寄。伏以鍾傳。比從屬郡。來援府城。撫綏而便洽衆情。禦備而能成遠略。高茂卿既多梗阻。不免回翔。固難掉鞅而旋。豈許垂囊而入。臣以戒之在鬪。事可從權。遂具奏論。輒陳利害。不料一言之善。遽得動天。終令二將之才。皆榮列土。鍾陵江徼。銅柱海隅。政成而必有可觀。恩重而各得其所。臣限拘鎮守。不獲稱謝行在。無任感激兢灼之至。謹奉狀陳謝以聞。謹奏。

謝就加侍中兼實封狀

右臣得進奏院狀報。伏奉某月日恩制。加授臣侍中。餘並如故。仍加食實封一百戶者。九重降命。萬里傳聲。側聆而踊躍忘疲。內揣而怔忡失措。伏以納言進秩。頒邑賞功。固須德望鎮時。仍有勳勞濟物。然後方可謂君無虛授。臣無虛受。如臣者。謬提旄鉞。免墜弓裘。空有志於四方。竟無能於一割。況自羣兇蝟結。戰陣蛇奔。狂鱗久戲於鼎中。聖駕遠巡於劍外。臣也動不能剗煙塵之患。靜不能瞻山海之資。遂蒙改易兵權。分張權課。雖值盤根錯節。其如有斧無柯。安邦之計策何成。富國之機謀莫就。唯甘黜爵。以警慢官。豈期陛下恩洽無偏。義深宥過。特超衆例。許陞高資。印標石鵠之祥。早慙不次。冠簪金貂之飾。愈覺非宜。況叨真食之榮。寬愧素餐之咎。但屬狼星未滅。鯨浪猶翻。方期抗旆以專征。不敢懸車而請老。謹當訓兵是務。殄寇爲期。粗申武弁之威。仰報彤門之賞。臣限守藩鎮。不獲稱謝行在。無任感恩戀聖戰汗屏營之至。謹奉狀陳謝以聞。謹奏。

謝秦彥等正授刺史狀

新授和州刺史秦彥

新授滁州刺史許勛

右件官。臣先奏請各授管内刺史。今月某日。得進奏院狀報。伏奉某月日勅旨。允許者。九天降寵。兩地分榮。覩降將之懷恩。喜元戎之獲請。伏以秦彥等。比者爲梟爲獍。維虺維蛇。久流螫蠱之灾。未有誅鋤之便。

臣偶令招諭。旋自歸投。遂假分符。皆能守節。誠宜獎勵。輒具奏論。今者聖澤濡枯。皇風盪垢。纔擲黃巾之飾。許登皁蓋之資。秦彥等既荷新恩。永除舊惡。必也出榮建隼。入効懸魚。學其守土之規。贖彼滔天之罪。臣限拘藩鎮。不獲稱謝行在。無任抃戴兢灼之至。謹奉狀陳謝以聞。謹奏。

桂苑筆耕集卷四

奏請從事官狀

奏請僧宏鼎充管內僧正狀

謝宏鼎充僧正狀

謝除姪男瓊授彭州九隴縣令狀

謝弟祝再除綿州刺史狀

謝姪男宏約改名濟除授揚州大都府左司馬狀

奏請姪男勛轉官狀

奏請歸順軍孫端狀

奏李楷已下參軍縣尉等狀

奏請楊行敏知廬州軍州事狀

奏請從事官狀

營田判官將仕郎殿中侍御史內供奉賜緋魚袋宋絢

右件官相門傳慶詞苑成名退居安東郭之貧就養奉南陔之詠自參戎幕備見良籌佐理而星霜屢遷

清勤而風雨不改。久稔重任。敢覬殊榮。伏請轉官。改章服。依前充職。

攝鹽鐵巡官。朝議郎。守京兆府。咸陽縣尉。柱國。高彥休。

右前件官。訓稟儒宗。才兼吏術。王畿結綬。早見勤勞。賓席曳裾。頗多婉畫。望憲臺之清秩。助權筦之重權。伏請轉官。依前充職。缺以前件狀如前。伏以臣子之所以立身者。以孝以忠。慎終如始。若遂榮親之望。必勤事主之誠。且如擇鄰卜居。斷織勵學。至於成立。色養無虧。能報慈母之恩。則宋綯有焉。又如教以義方。退而學禮。至於仕官。力行有規。能遵嚴父之訓。則彥休有焉。臣是以久藉謨猷。仍嘉德行。事堪勵俗。志切薦賢。伏惟皇帝陛下。恩流域中。孝理天下。特廻睿獎。許假賓缺。冀令修己從知。盡以敬親務本。干黷宸扆。無任兢惶。謹錄奏聞。伏聽勅旨。

奏請僧宏鼎充管内僧正狀

右件僧。跡洗四流。心拘八政。演法於有緣之衆。致功於無缺之言。伏自翠華遠省於風謠。丹詔屢徵於月捷。兇渠未滅。銳旅猶勤。宏鼎常令僧三十人。晝夜轉念功德。張開覺道。教化闔城。所願早覆梟巢。便廻鸞駕。雖不關於至理。實自發於精誠。兼緣當道。屬郡既多。仁祠不少。若無綱領。難肅緇流。伏乞聖慈。俯詳所請。許充當道管内僧正。仍賜紫衣。所冀身掛金欄。逞養鷹之雋氣。手持玉柄。制醉象之狂徒。謹緣奏聞。伏聽勅旨。

謝許宏鼎充僧正狀

右件僧。臣先具狀申奏。請充當道管內僧正。仍賜紫衣。伏奉勅旨。依允者。伏以宏鼎久勤。轉念輒具薦論。能資十地之因。遽荷九天之寵。元戎獲請。喜三教之並行。法侶歡呼。驚一佛之或出。唯冀永持功德。上報慈悲。苟不能盪火宅之餘災。則何以稱水田之華服。必可潛燃慧炬。助滅妖氛。臣限守藩條。不獲陳謝。行在。無任感戴兢灼之至。謹奉狀陳謝以聞。謹奏。

謝除姪男瓊授彭州九隴縣令狀

前守京兆府鄠縣尉高瓊

右件官。是臣姪男。今得進奏院狀報。伏蒙勅旨。除授彭州九隴縣令。仍賜緋魚袋者。伏以高瓊早乏藝能。忝從祿仕。佐理未閑於吏道。列官已陟於王畿。昨者背秦嶺而脫煙塵。面蜀川而就雲日。雖有心於蔡藿。且無托於萍蓬。豈料不由薦論。便賜超擢。纔拋黃綬。遽沾墨綬之榮。始佩銅章。又竊銀章之貴。況乃濛陽屬邑。益部名區。正當巡幸之邦。實謂來蘇之地。豈伊殘劣。能此勝當。臣也必令行慎。履冰坐勤。飲水勉追芳於花縣。無致辱於竹林。臣限守戎藩。不獲稱謝天庭。無任感恩戰懼之至。謹奉狀陳謝以聞。謹奏。

謝弟祝再除綿州刺史狀

綿州刺史高祝

右件官。是臣堂弟。今得進奏院狀報。奉某月某日恩制。除授金吾將軍。被軍州官衆狀舉留。續准勅旨。依前授綿州刺史者。恩資鳳展。喜集鵠原。形影光輝。精魂震越。伏以高祝早從裾履。免墜箕裘。既懸報主之

誠得習牧人之術。昨者忝膺寵寄。粗舉政條。銀水金山。曾無自潤。帶牛佩犢。或有可觀。振家聲廉慎之名。致郡俗舉留之請。況乃秩假帝之喉舌。官登王之爪牙。仕官旣榮。分憂又重。祝也必遵勗勵。更慎撫綏。不辜署劍之恩。以謝擁轅之衆。臣亦申教誨。俾贖貪叨。俱在朝之盛儀。雖慙前哲。各爲郡之清譽。可畏後生。共資綽綽之詩。冀播優優之政。臣限拘藩鎮。不獲稱謝行在。無任感恩抃躍之至。謹奉狀陳謝。謹奏。

謝姪男宏約改名濟除授揚州大都府左司馬狀

朝散大夫前行潤州上元縣令柱國高宏約。

右件官是臣姪男。先具奏請。除授揚州司馬。並請改名濟。伏奉勅旨依允者。九天渥澤。萬里塗程。沐恩命於堯階。泛光輝於阮巷。負山旣重。臨谷何安。臣以高濟。早列官常。頗聞吏術。建業字人之政。曾有微功。維揚典午之資。敢希薄授。始陳上請。驟竊殊榮。濟也譽雖讓於王晞。名不慙於程昱。聖君如父。照臨實表於無偏。猶子比兒。訓勵必遵於匪懈。俾申勤效。少贖貪叨。臣限守藩條。不獲稱謝行在。無任感恩激切兢灼之至。謹奉狀陳謝以聞。謹奏。

奏請姪男勗轉官狀

前鄂州都團練副使朝議郎檢校祠部郎中兼侍御史柱國賜緋魚袋高勗。

右件官是臣親姪男。粗詳吏術。早忝官常。始佐理於江陽。旋從知於寒壤。實得片言以折獄。未嘗枉道而事人。遂荷寵榮。已登班列。尋叨命服。久倅廉車。方當寇盜喧驚。亦有籌謀施展。加以每遵家法。願報國恩。

宗族稱孝悌之名。僚友許溫恭之行。臣是以輒思內舉。敢具上陳。引以進之。守戴禮之深義。惟善所舉。憑魯書之美譚。伏乞聖慈。俯鑑忠懇。特賜除授。峽內刺史。劬也必能勵心從政。常銘馬援之言。竭力分憂。不負謝安之舉。干黷宸扆。無任兢惶。謹錄奏聞。伏聽勅旨。

奏請歸順軍孫端狀

歸順軍都知兵馬使銀青光祿大夫檢校國子祭酒兼左武衛將軍御史中丞上柱國孫端。右件官。巢鳥知風。園葵向日。能投善教。永戢奸圖。既悛抗斧之心。可在執殳之列。仰希甄獎。輒具奏論。伏乞聖慈。特授一官。勒在軍前驅使。冀率感恩之衆。永除稔惡之徒。謹錄奏聞。伏聽勅旨。

奏李楷已下參軍縣尉等狀

以前件狀如前。伏以臣當府淮海奧區。州縣多事。永言屬吏。實藉得人。每憂輿賦闕懸。漸難責辦。若俟銓衡注擬。恐失舉賢。前件官等。皆爲君子儒。有古人志。學優則仕。既知祿在其中。見善若驚。不愧藝成而下。可以參臣軍事。可以代臣邑僚。試假缺員。頗彰殊效。況抱斑衣之樂。冀攀黃綬之榮。伏乞聖慈。允臣所請。干冒宸鑑。無任兢惶。謹錄奏聞。伏聽勅旨。

奏請楊行敏知廬州軍州事狀

右臣伏以武士所先。惟忠與勇。忠勇兼著。行敏有之。自假郡符。缺能勤理。銳旅有爭先之志。齊毗無背怨之詞。蓋乃訓練齊戎。撫綏周室。在於巡屬。實越輩流。累具奏論。請賜正授。伏慮道塗艱阻。未達宸聰。每藉

幹能再陳薦舉。永言成績。可使頒條。伏乞聖慈。特賜允許。干黷宸鑑。無任兢惶。謹錄奏聞。伏聽勅旨。

桂苑筆耕集卷五

奏誘降黃巢下賊將成令瓌狀

奏誘降福建道草賊狀

奏姪劭華州失守請行軍令狀

奏論天征軍任從海等衣糧狀

奏論抽發兵士狀

奏請叛將鹿晏宏授興元節度使狀

進金銀器物狀

進漆器狀

進御衣段狀

進綾絹錦綺等狀

奏誘降黃巢下賊將成令瓌狀

草賊黃巢下壁隊賊將成令瓌。徒伴四萬人。馬軍七千騎。右件賊徒元受黃巢指使。占據潼關。尋自壁隊奔逃。所在燒劫。就中斬黃管内。最甚傷殘。臣伏以肅齊王

者之師。必期無戰。遵奉聖君之德。可恕有瑕。暫緩討除。先加告諭。臣昨者專差押衙丁威。賫委曲深入招誘。果願歸降。兼乞委任郡符。展效忠節。其成令瓊。臣當時補充軍前。押衙兼給功名。檢校國子祭酒。兼御史中丞。官告一通。權知楚州軍州事。以今月二十三日。部領手下兵士。到楚州倒戈。訖伏緣楚州與徐州連水對岸。今春曾被寇戎。驟來攻劫。雖頻討逐。未盡誅擒。況連水賊徒。久蓄姦謀。潛行偵諜。常排戰艦。欺視孤城。再欲奔衝。終爲患害。臣以此特將此郡。權授令瓊。既能投信義而來。必得破頑兇之窟。臣久臨戎事。素習軍謀。以爲前則惠而後則誅。兵家所貴。遠者懷而近者悅。帝道方興。上窺含垢之恩。下察慕羶之志。不勞寸刃。唯假尺書。成令瓊遂革野心。能從天意。叛徒四萬。盡爲樂業之齊人。精騎七千。皆作輸忠之烈士。旣當恕罪。倍見感恩。蜂飛之小寇。旋銷。蝟結之元兇。可殄。斯乃陛下祝除三網。舞耀兩階。信旣洽於豚魚。化能移於梟獍。善師不陣。敢矜止殺之權。至道無私。但仰好生之德。其成令瓊下。願在軍門。及放散人數。請續具申奏。謹錄奏聞。謹奏。

奏誘降福建道草賊狀

福建道溪洞草賊何嶠張延鄂璚棟等。徒伴共八萬人。

右件賊徒自去年冬。侵劫信州界內。臣以其道途阻闊。溪洞險艱。若欲討除。恐爲勞役。遂於今年二月內。差節度衙推諸葛成充東面招諭使判官。便賫委曲職牒。招誘其賊首何嶠等三人。雖行匪有師。而卜能從吉。一時應響。三窟除姦。纔當言下。歸投。兼乞軍前展效。臣缺缺委曲補職名。追赴軍前。俾申忠節。臣伏

以小人興叛。所迷者貪競之心。上帝垂恩。所惡者殺傷之事。終能耀德。固可弭兵。與其繼獻捷書。曷若盡收降款。是以遠飛折簡。便倒羣戈。塵不假於曳柴。風自行於偃草。溪頭洞口。免汚烟霞。閩嶺鄱江。豁通道路。況乃各期後效。盡願前驅。能令八萬餘人。永不二三其意。有以見陛下皇威天覆。元德日新。四郊之煙壘將銷。萬國之梯航競集。則乃軍中士卒。安身而永別戰場。宇內生靈。攜手而齊登壽域。臣無任歌詠屏營之至。其何疇等。下補職名。願隨臣征行。及放散人數。請續具申奏。謹錄奏聞。謹奏。

奏姪男劭華州失守請行軍令狀

具銜高劭

右臣伏以。僭軍之將。禮所興譏。大義滅親。傳曾垂訓。將肅安危之本。必嚴賞罰之科。竊自巨猾增驕。王師致討。臣堂姪男劭。比在河中司錄。得受李缺都指揮。領昭義之甲兵。收華州之城邑。稍申鷹犬之力。暫挫梟狼之聲。已蒙特降殊恩。俯旌微效。服榮金紫。位忝星郎。始雖蒲坂之具寮。遽假蓮峯之通守。誠合率忠勵勇。馘醜摧兇。稟進尺退寸之規。決萬死一生之計。終申誠節。仰報寵光。昨者狂孽僭來。疲兵再戰。既絕安西之救。難申逐北之威。然而不能潤草塗原。永忘苟活。仰使靡旗亂轍。旋見脫歸。致諸道之星分。縱姦徒之霧結。職此之過。罪無所逃。豈可當二峯保守之時。遽沾寵賞。及一陣奔亡之後。得免誅夷。國有常刑。軍無貸法。懲一勵百。念茲在茲。伏乞聖恩。特行嚴典。徇于藩鎮。警彼師徒。所冀國章。永能安于社稷。微臣家法。亦不昧於神祇。干冒宸聰。無任責躬泣血。戰越之至。謹奉狀陳。請以聞。謹奏。

奏論天征軍任從海等衣糧狀

天征軍都將任從海及節級軍將並官健總二百八十七人

右臣得都將任從海及節級狀稱自赴征行已逾五載累曾沿海襲賊上江防虞去年軍都放迴本道從海等且在當府願隨行營者各得家信知西川已停衣糧伏緣從海等皆是貧寒更無營業彼處父母親屬便須委壑填溝請具奏論乞還衣糧者謹按史記釋云天子車駕所至則人臣爲僥幸賜人爵有級數或賜田租之半故因謂之幸也伏以任從海等萬里從戎五年于役不辭艱險願盡勤勞今者身在東吳職居西蜀此方苦於騶旅彼已停其衣糧遠路音書難寫征人之恨貧家親戚先懷餓殍之憂伏遇陛下暫幸龜城未迴龍闕三川草木別有光榮萬戶烝黎永能蘇息而任從海等久離本鎮不睹殊恩望雨露之均沾恨烟波之迥隔固堪傷憫輒具奏論伏乞聖慈允臣所請特令本道卻給全糧所冀鳳駕巡遊士卒皆知其有幸鴻慈煦育君親必表於無私謹具錄奏聞伏聽勅旨

奏論抽發兵士狀

當道先准詔旨抽盧壽濂和等州兵馬共二萬人仍委監軍使押領赴軍前者臣當時已各帖諸州令排比點檢次又得進奏院狀報近奉詔旨更於諸州催促兵士者

右臣伏以兵惟飾怒雖尙勇於戰征師克在和固推誠於輯睦苟非得衆何以成功臣當管廬州與和州舊有讎嫌至今疑忌唯謀以怨報怨未遂知和而和孫端新授濂州又與秦彥有隙既是濂和接境動有

他虞。若於光蔡會軍。必酬舊憾。事非便穩。理合奏論。臣自得招降。多方控馭。粗能禁戢。免有動搖。如令各出兵戈。必恐自相魚肉。輒陳利害。冀慎始終。謹錄奏聞。伏聽勅旨。

奏請叛將鹿晏宏授興元節度使狀

右當道賀正子將許令琮等。今日日迴得狀稱。三月五日。陳許軍潰散。節級鹿晏宏。領兵馬二萬餘人。打破金洋等州。突入興元府。坐節度使牛勗。四日夜領隨從人並家累。約二千餘人。奔投龍州西山谷者。伏以天未悔禍。地多受災。既當易動難安。非可懲一勸百。鹿晏宏早驅散卒。廣集叛夫。始聆焚劫東都。旋見奔衝西路。本道節度使周岌。累令招諭。終不歸降。豈興破浪之風。但熾燎原之火。今者逆黨則鯨吞盛府。元戎則鼠竄危途。瓜距已成。根株難剗。儻或未恕亂常之咎。別興伐叛之師。卽恐終成一秦。固應不利三蜀。且列藩貢獻。諸道表章。得達刀州。皆由劍路。況乃鳳城已復。鸞輅將旋。縱令鵬鶚在天。能摧狡窟。若更豺狼當道。必礙行宮。峽路雖通。水程多慮。不唯險阻。實且遐遙。兼至上江。皆爲賊境。唯憂進獻。莫遂通流。臣久竊寵光。深懷驚憤。遠詳事意。輒具奏陳。伏乞聖慈。霽雷霆之威。迴雨露之澤。速飛寬大之詔。特委撫綏之權。鹿晏宏免致麀驚。便當豹變。必當克己。永務安人。聖主含宏。旣宥其窮斯濫矣。姦臣警悟。亦免於尤而效之。謹錄奏聞。伏聽勅旨。

進金銀器物狀

金器 銀器

右臣伏以烟塵向息。道路猶虞。每慙仗鉞之榮。多曠獻琛之禮。得申遠貢。唯有輕賚。前件金器銀器等。質變披沙。形分鑄礫。雖愧易盈之用。且資虛受之功。固敢竭航。波梯獻之心。助麟趾馬蹄之瑞。貢金三品。空陳任土之宜。望闕九重。未遂朝天之願。感恩何極。戀聖徒勤。今差押衙王虔。隨狀奉進。謹進。

進漆器狀

當道造成。乾符六年。供進漆器一萬五千九百三十五事。

右件漆器。作已淫巧。用得質良。冀資尙儉之規。早就惟新之製。雖有慙於瓊玉。或可代於瑠瓶。伏緣道路多虞。星霜屢換。器貢難通於萬里。綱行遂滯於三年。既失及時。唯憂虛月。臣今差押銀青光祿大夫。檢校太子賓客兼御史中丞。上柱國辛從實。押領隨狀奉進。謹進。

進御衣段狀

當道先兼鹽鐵使。織造中和四年。已前御衣。羅折造布。並綾錦等。除先進納外。續織造九千六百七十八段。謹具如後物色。

右臣久權筦貨。素乏籌謀。多虧山海之資。莫報雲天之澤。前件御衣。並綾錦綺等。薄慙蟬翼。輕愧鴻毛。然而舒張。則凍雪交光。疊積。則餘霞鬬彩。既成功於鳳杼。希入用於龍衣。儉德彌彰。致美宜先於黻冕。皇恩遠燭。輸誠必鑑於絲毫。其匹段物等。臣謹差某官某。押領隨狀奉進。謹進。

進綾絹錦綺等狀

進奉綾絹錦綺銀等一十萬匹段兩。謹具色目。如後物色。

右臣伏以兵戈充熾。郡邑凋殘。仰思御輦巡遊。唯恨賦輿懸闕。況乃當道巡屬之內。招降頗多。皆請占留。將充供贍。貴息寇戎之患。難豐進獻之儀。前件綾絹錦綺等。雖製自鴛機。而價慙鮫室。負謝八蠶之號。劣登三品之名。祇將申任士之宜。豈足備補天之用。輕微既甚。隕越何安。其匹段物色。謹差節度散兵馬使王審球等。押領隨狀奉進。謹進。

桂苑筆耕集卷六

唐高麗都統巡官侍御史內供奉崔致遠撰

賀入蠻使迴狀

賀殺黃巢賊徒狀

賀收復京城狀

賀月蝕德音狀

賀內宴仍給百官料錢狀

請降詔旨指喻兩浙狀

謝加侍中兼實封狀

謝落諸道鹽鐵使加侍中兼實封狀

謝弟祝再除綿州狀

請轉官從事狀

賀入蠻使迴狀

右臣得進奏院狀報入南蠻通和使劉光裕等迴雲南通和兼進獻國信金銀器物匹段香藥信馬等漢

使傳詔。則星迴象林。蒙王奉琛。則雲集龍闕。能舉羈縻之術。果悛倔強之心。若非聖上德叶棄瑕。化敷柔遠。則何以感鑠耳鑠身之衆。啓墮肝瀝膽之誠。彼越雉呈祥。未爲盛觀。旅獒入貢。徒見良箴。曷若正在艱時。能安獮俗。使雲南酋長。再遵奉贊之儀。天下賢良。免獻征蠻之策。斯皆相公魏絳陳利。王商振威。已令六詔歸投。即使八紘清謐。某比者南尋銅柱。西鎮劍關。曾施上將之謀。免辱大君之命。今則遠聆盛事。倍切歡心。陳賀末由。無任欣抃。云云。

賀殺黃巢賊徒狀

右得進奏院狀報。定難軍拓跋相公。保大軍東方達尙書奏。於宜君縣南。殺戮賊徒。並生擒賊將。又鳳翔李相公奏。探知京中賊徒潰散。六月十三日。聖上御宣政殿。排仗受賀者。竊以逆賊黃巢。稔惡既多。就刑非久。敢驅烏合之衆。屢拒鷹揚之師。拓跋相公。東方尙書。或力微裔孫。或曼倩餘慶。皆申祕略。共弭兇徒。能順天誅。遂陳月捷。軍名定難。雅稱關張之聲。縣號宜君。克符堯舜之德。是以聖上高臨紫極。遠耀皇威。睹百辟之歡呼。雷驚蜀國。想六師之勇戰。電掃秦川。卽當靜滅氛靈。永見均施渥澤。此皆相公調鼎中之味。運堂上之兵。右援枹而得功。左執律而至獻。勳功相繼。稱慶何窮。某久阻淮夷。尙淹海徼。遠聆捷語。但切歡聲。然必願劍拂狼星。旗迎聖日。終繼張飛之拒倭。不慙攝叔之致師。限守戎藩。末由陳賀。下情無任踴躍之至。謹奉狀陳賀。謹錄狀上。

賀收復京城狀

右得河中節度使王司空牒報四月十日當道與雁門節度使李僕射及都監楊驃騎下諸道馬軍齊入京城與賊軍交戰約殺賊步軍一萬餘人其馬軍賊便走出城黃巢亦未知存亡其逃遁賊徒尋差兵馬追奔並已收復京闕訖者伏以逆賊黃巢藏姦匿暴惡積禍盈久於輦下偷生固是檻中待死楊驃騎受聖君之重寄李僕射傳飛將之雄名既無慮於二心果有成於一力想其霜鋒電擊月羽風驅壓雀卵之威高燎鴻毛之勢猛遂使賊巢困不能鬪亂無所歸雖爲漏網之鱗已是傷弓之翼則期加顯戮永掃羣兇加以熊據六宮豕僇九陌今茲克復免致焚燒佇望翠華便歸丹闕稍豁上天之怒實除下土之灾此皆相公靜運廟謀遠揚戎略既叶一匡之妙道北極何憂將流萬古之美談東封可俟某登壇有忝仗鉞無功遠聽歡聲始除慙色限拘守鎮陳賀末由下情無任抃躍之至謹錄狀上

賀月蝕德音狀

右伏見六月二十六日德音以太陰薄蝕曲赦三川管內囚徒及委諸鎮收拾埋瘞京畿四面暴露骸骨者伏以金精隱耀玉辰垂仁答天誠以震驚省風謠而欽恤圓扉宥罪掃彗銷冤近鄙北齊號御囚而肆虐遠遵西伯葬枯骨以施恩蜀山之草木先春秦甸之烟塵永息此皆相公功成變理道洽變通助日月之光輝振雲雷之號令八方翹首萬彙歡心某跡繫戎旃心馳臺室阻隨班列莫遂歡呼下情無任抃躍之至謹奉狀陳賀謹錄狀上

賀內宴仍給百官料錢狀

右得進奏院狀報。七月一日於內殿宴百官。仍令度支各給三箇月料錢。並奉勅旨。迴駕之日。應沿路州縣。切不得輒進歌樂及屠殺者。伏以聖上繼周匡業。避狄興憂。自幸成都。彌資儉德。守元元之三寶。達舜帝之四聰。撤彼珍肴。掛其素服。言唯罪己。事不勞人。今者已復上京。將迴大駕。致柏梁之高宴。盡醉千鍾。鄙鍊布之乏財。均頒九府。然後繼飛綸翰。仍命繡衣。制郡邑之嚴科。節道途之浮費。既施令於好生。惡殺亦停。歡於八列九成。王化斯行。物情皆泰。此皆相公手攜多士。躬賀聖君。駕行賦在。鎬之章。鳳藻詠濟汾之樂。一時盛事。萬代美談。某限守藩條。阻攀仙仗。心馳蜀棧。目斷堯樽。下情無任抃躍之至。謹奉狀陳賀。謹錄狀上。

請降詔旨指喻兩浙狀

右先准浙西周相公牒。杭州與浙東兵士鬪敵。某遂具事由。申奏請降詔書。速令戢斂。伏奉二月二十日詔旨。已詔兩浙務在叶和者。某當時備錄王言。各移公牒。訖兼先差人賫書牒與劉漢宏尙書。詰彼起戎之本。諭其繼好之規。今得迴書。其言不讓。唯稱周相公與董昌。苟恃寵榮。妄行威福。虐侵近境。阻截通津。況有不同國之讎嫌。又失無疆年之誓約。必想見豺而戰。猶能首鼠幸生。已決加兵。終期釋憾。然則此無和氣。彼有鬪心。膏膽者結怨既深。扶眼者遺言可驗。必恐以吳興越終當有越。無吳實所謂夫差之麋鹿興。譏范蠡之鼃鼃得便。唯憂黎庶枉見殺傷。輒再具奏狀陳請。更飛詔止遏。某徒圓鑿方柄。避柱觸楹。累陳高鳳之詞。莫解子都之怒。且讎因手足疾在腹心。久練師徒。決期戰伐。今也衛絲轉亂。鄭蔓難除。三人

是仇百姓何罪。伏惟相公贊成睿略。施展廟謨。俾陳兩武之事端。唯仰一言之恩庇。謹錄狀上。

謝加侍中兼實封狀

右得進奏院狀報。伏奉十一月十一日恩制。加授侍中。仍加食實封一百戶者。伏以某材輸美箭。業紹良弓。早勤式遏之規。敢怠聿修之訓。遂得一分戎闢。七換師壇。提漢法之重權。陟秦官之極品。恩榮獨盛。績效何申。況自蠶尾之徒。蝟毛而起。神州傾陷。御輦巡遊。不能踴躍用兵。有類遷延之役。雖進退惟命。不敢爭功。而行藏相時。豈無懷愧。而又鑄山煮海。瓜剖豆分。莫成瞻國之權。徒竊經邦之位。唯甘廢棄。永見沉淪。敢期渥澤之無私。俯念涓埃之有效。許登玉署。高戴金璫。仍忝真封。式加懋賞。且如講能奪席。諫切引裾。方升鸞渚之榮。俾稱鳳池之望。豈伊孱劣。所有貪叨。此皆相公仰贊萬機。俯安九牧。無使怨乎不以。能令可者與之。唯當三命益恭。一辭無退。入則撫安疆圉。出則誓掃氛孽。佇成滅寇之功。冀贖曠官之責。戎鎮有限。不獲陳謝。下情無任感恩兢懼之至。謹奉狀陳謝。謹錄狀上。

謝落諸道鹽鐵使加侍中兼實封狀

右某伏奉去年十一月十一日恩制。加授侍中。並餘如故。仍加食實封一百戶。落諸道鹽鐵使者。伏以君親委任。固能捨短從長。臣子忠勤。唯願從微至著。某一司權課。六換暄涼。正逢多事之秋。莫展牢籠之用。況自頻更統帥。別致租庸。既當狐讓千皮。實見羊分九牧。瞻軍富國。固絕籌謀。熬海鎔山。幾墮條貫。今者聖上恕其不逮。察以無私。將漢法之重權。委儒流之妙術。豈料更留宸慮。猶念戎勳。許登負璽之班。資不

替擁旄之寵寄。尙假極品。重增實封。當主憂臣辱之時。若斯榮盛。審福過灾生之理。何以遑安。此皆相公曲庇庸虛。全忘僭忝。俾息躬於負重。當銳志於專征。寧無淬礪之功。仰答陶鈞之賜。此外以榮爲懼。至末如初。下情無任感戴兢惕之至。謹奉狀陳謝云云。

謝弟祝再除綿州狀

右件官。是某堂弟。今得進奏院狀報。奉某月某日恩制。除金吾將軍。被本州官吏衆狀舉留。續准勅旨。依前充綿州刺史。某嘗讀後漢書。見寇恂爲潁川守。後拜金吾。從上經過潁川。郡人遮道。願借寇君。仍留一年。以慰百姓。此實國家殊寵。郡邑美譚。萬代以來。一人而已。誰知盛事。得屬鄙宗。安貧恤孤。潁川之政化雖乏。出官入仕。子翼之官資略同。感深而喜作悲端。效淺而榮爲懼本。伏以高祝粗嫻吏術。忝荷君恩。分憂而地壓劍關。理俗而塵銷鈴閣。今者纔升緹騎。卻擁朱輪。謂施撫輯之能。特徇衆多之請。此皆相公愛忘其短。仁及於微。仰贊帝俞。俯從羣願。某唯知提訓。俾慎揣摩。同驅軾下之熊。但期靜理。雖暗堂前之燕。免限分飛。限守戎藩。末由陳賀云云。

請轉官從事狀

某官辭礪

右件官。閔損登科。良由德行。陳琳從職。實假詞華。林幽而轉識芝蘭。木落而方知松桂。深敦操尙。夙著幹能。遠叨分闔之榮。唯藉運籌之妙。伏請轉官。仍改章服。轉充觀察判官。

某官鄭倣。

右件官早登上第。久佐大藩。能修檢慎之規。每助撫綏之政。賓筵所重。健筆爲先。伏請轉官。仍賜章服。轉充節度掌書記。

某官顧雲。

前件官東筇孕美。南桂抽芳。曳謝眺之長裾。從衛青之軍幕。五羖皮之爲重。豈請虛譚。百鷺鳥之不如。方知實事。良資妙畫。共展壯圖。伏請轉官。仍賜章服。充觀察支使。以前件狀如前。伏以某遠率舟師。誓除國賊。征帆則雲掛行色。戰鼓則雷含殺聲。留務旣繁。良籌是托。或倚幕中之婉婉。或求馬上的翩翩。輒具薦論。仰希甄獎。不拘月限。別覲天恩。伏惟相公庇護戎藩。激揚賓席。稍超常例。特受清資。略假潤於丹青。許分榮於朱紫。所冀元戎十乘。速成討罰之功。越府三才。各得弛張之處。已具狀申奏。訖云云。

桂苑筆耕集卷七

別紙 十首

滑州都統王令公三首

鄭畋相公二首

史館蕭遘相公一首

度支裴澈相公一首

租庸王徽相公一首

前太原鄭從讜尙書一首

禮部夏侯潭侍郎一首

吏部裴瓚尙書二首

宣歙裴虔餘尙書二首

鹽鐵李都相公二首

盧紹給事一首

壁州鄭凝績尙書一首

泗州鄭庾常侍一首

湖州杜孺休常侍一首

滑州都統王令公

伏見制書。伏承榮加內史之任。暫執元戎之權。往鎮雄藩。誓殲窮寇。佇復宮闕。期歸廟堂。九重之倚賴如山。八表之歡呼動地。而況令公志勤捧日。力贍補天。三秉台衡。兩分戎律。入則建蕭何之功業。出則振黃霸之恩威。此皆羣議稱揚。不假拙辭贊詠。今者聖上以叛徒乘便。尙敢侮張。諸道徵師。互相逗撓。蠢彼之姦兇未弭。赫斯之憤怒良深。遂輟股肱。遠資心膂。薦敷宰楚。設前茅後勁之規。管仲相齊。致九合一匡之譽。是以榮轉西臺左相。請爲東道主人。儒武全材。古今罕遇。伏想近承睿略。嚴令諸侯。誠知白馬封疆。幸而獲賴。必料蒼鵝羣黨。困不能飛。卽當立剗梟巢。去迎鑾駕。海晏而永興龍德。池清而再睹鳳儀。凡在含靈。皆增係望。某靜思奮擊。動見悔尤。四鄰多是異心。十道竟誰同力。今所以自賀者。得逢知己。親總貞師。巧唇無所搆之端。壯膽有可傾之處。唯冀遙稟大將軍之命。用勵驍雄。仰憑眞宰相之威。永除妖孽。末由陳賀。下情不任欣慰瞻攀虔祝云云。

第二

伏睹制書。伏承榮膺寵命。正鎮雄藩。伏惟感慰。竊以動惟佐聖。靜乃優賢。百穀垂成。則暫停霖雨。八紘向泰。則貴息兵戈。詎勞有道之人。久練不祥之器。羣情旣鬱。帝命斯行。令公獨竭忠誠。克扶厄運。當六師扈

從司南之制度無虧。及十乘啓行。逐北之威稜有裕。但屬王事靡盬。人心不同。祖豫州志在誓江。佇申壯節。蕭相國力謀佐漢。或致遊詞。今以小寇必殲。大臣于役。慮失華夷之望。倍興宵旰之憂。遂仍鳳紙傳恩。遠離西蜀。蜂旗卷影。卻到南燕。指蹤既稟於成謀。搏噬佇看於衆旅。坐驅十道。臥埋百城。顯爲出入之寵。榮保就始終之勳業。某夙銜深獎。繼奉好音。覽古人賀滿之言。睹君子持盈之節。抃慰攀戀。不任下情。伏惟云云。

第三

伏承旌幢已到鎮上。訖伏惟感慰。令公手傾霖雨。身耀福星。三入廟堂。已超仲父。一匡寰宇。更屬何人。昨者十乘啓行。九重軫慮。以爲蜚不勞海灌。卯何假山摧。遂請元臣。卻臨重鎮。今則徐迴龍節。靜撫雄師。下車而恩澤均沾。舉扇而仁風廣振。南燕受賜。北極紓憂。某早荷獎知。倍增欣慰。云云。

鄭畋相公

伏見二月六日制書。伏承相公正居宏父。光弼聖君。兼總蘭臺。再調梅鼎。凡云遠者近者。莫不舞之蹈之。伏以相公碩德茂勳。雄才奧學。播在四方之口。飫於萬乘之心。固絕贊揚。但增瞻仰。況自關中聚寇。岐下屯兵。率先諸侯。累展奇略。是以才趨鳳輦。便陟鸞臺。遠陟山川。行就九天之寵。克平水土。坐升百日之榮。竹宮既託於清規。芸館更歸於雅望。則乃孫叔敖之慎守。愈貴愈恭。胡伯始之累遷。有倫有要。永憑上德。佇賀中興。使仲父執鞭。鄴侯捧轡。驅蠢動入華胥之域。格蠻夷歸虞舜之風。某早沐深知。遠聆殊拜。末由

陳賀抃聳倍深云云。

第二

伏承太保相公累陳章表。懇讓鈞衡。暫輟任於股肱。果優賢於羽翼。緇衣纁美。青綬加榮。守難進易退之規。叶居安慮危之道。莫不宸衷欽矚。摺紳詠歌。而況相公比者統冠甸侯。深攻國賊。倡義聲而飛羽檄。官爵賞而練甲兵。方驅破浪之風。佇滅燎原之火。而乃腹心有疾。牙爪無功。何君子之見欺。實小人之難養。然而災爲福始。小往大來。再秉洪鈞。遠安仙蹕。調鼎中之實味。運堂上之奇謀。決勝漢籌。弭災魏闕。皆憑蕭丞相指蹤之力。豈假鮑尚書統集之兵。咸推第一之功。能贊登三之業。今則奉身有裕。止足無虧。將尋疏傅之高蹤。乃訪留侯之故事。用黃石公之妙略。蔚爲帝師。從赤松子之勝遊。別作仙侶。雖云獨樂。其奈衆情。氛曠餘妖。方願靜銷於天下。陶鎔重望。豈宜久滯於山中。必計才返鸞旌。請歸鳳闕。永使蜩螳罷噪。仍令鹿馬分形。深荷眷私。況聯親懿。依攀禱望。可鑑遠誠。拜賀末由。悚戀增切云云。

史館蕭邁相公

昨睹制書。恭承高辭大計。正陟中台。兼升史館之榮。實副儒門之望。竊以冊書所重。筆削爲難。別成一代之楷模。曷掩百王之規矩。是得宸衷妙選。朝列具瞻。而況相公真君子儒。老成人德。允釐百揆。顯贊萬機。今者邦計旣豐。國經斯整。東西臺之極位。敷歷無遺。左右史之直言。裁成有賴。莫不助華表德。遊夏緘詞。能施補袞之功。備載垂衣之化。必使褒真貶僞。彰發傳之體有三。激濁揚清。勵事君之心無二。古今盛美。

遐邇欽依。某遠守藩維。忝資陶冶。每慎六條之理。敢希一字之褒。抃躍既多。啓陳無及。伏惟俯賜念察。

度支裴徽相公

伏睹除書。伏承相公再履台席。榮均賦輿。凡在生靈。莫非欣躍。某今之所賀者。真以天上之福。與大國之幸。不欲更牽俗禮。強飾繁詞。然而歡心有餘。祝史無愧。敢陳贊詠。冀豁懇誠。伏以相公德襲清通。道資恭儉。歷游華貫。高陟台衡。當聖君巡行之初。見賢相變諸之業。而乃鵠原陷難。鳳閣辭榮。暫屈跡於外藩。尋秉權於大計。今者天將悔禍。日待升平。果請英才。卻歸舊位。躡周司馬統兵之秩。聘晉尚書較運之謀。四方所傳。一意相賀。某每慙薄伎。偏荷殊私。再逢調鼎之期。實切彈冠之望。末由陳賀。但增攀戀。聳抃之至。云云。

租庸王徽相公

伏睹制書。伏承榮膺寵命。伏惟感慰。伏以萬乘巡游。最難留事。百官毗倚。允屬持綱。況當返駕之時。尤重清宮之禮。膺茲寵寄。實在賢能。司空相公。靜抱長材。動施餘刃。報主安人之業。早冠鼎司。東姦芟弊之名。已諧輿論。今者鳴鳩命氏。鷹隼揚威。內清輦轂之塵。外肅關畿之地。聖君新命。永託中庸。司隸舊章。佇觀大禮。某忝承眷獎。欣抃實深。云云。

前太原鄭從讜尚書

得河中王相國書報。伏承相公榮膺寵命。將赴京國。伏惟感慰。伏以宸游既遠。居守是難。須倚元臣。方安

聖慮是故昔漢帝曰。吾與僕射何異。則知重寄。別表顯恩。而況相公。岳立儒宗。川流相業。頃辭鳳閣。遠耀龍旌。郭伋示信之鄉。廣沾恩化。周舉移書之地。遍活疲羸。肅軍令於貔貅。振兵威於獬豸。求安邊境。胡難不敢南侵。遽值妖氛。周馥久勞西狩。今以玉京雖復。鑾輅未迴。輟戎略於藩垣。託繁機於宮闕。必計中和。樂職已繼雅音。司隸舊章。卽興盛禮。然後重調梅鼎。永對宴階。贊成天下之春。固是轂中之事。凡云品彙。莫不欣歡。某早忝恩知。倍增抃慰。末由陳賀。但切依攀。云云。

禮部夏侯潭侍郎

伏承榮膺寵命。伏惟感慰。侍郎泰初朗鑑。日月難踰。孝若美姿。風塵莫染。儒室別開其戶牖。相門必繼其弓裘。是以始於憲府宣威。便見儀曹主貢。履歷而皆遵仙路。操持而永振貞風。柏列朝霜。昨日揖登臺御史。桂開夜月。今朝選入室生徒。採珠而蓬島待空。搜玉而藍峯寡色。副天下正人之願望。息場中藝士之屈聲。某早沐眷私。不任欣抃。云云。

吏部裴瓚尙書

伏承榮膺寵命。伏惟感慰。竊以助華聖代。唯務舉能。邵泰賢流。共推取實。用捨旣歸於重柄。古今皆託於長材。人望所諧。主恩斯在。尙書情疎宦路。性悅道風。月高而霜鶴數聲。雲卷而蓮峯萬仞。早知厄運。久避囂氛。洋川之瑞草仙花。幾牽蝶夢。閬苑之朝嵐暮靄。深潤豹姿。然而陶鈞難住於山中。塗炭待平於天下。遂辭肥遯。來謁宸遊。果登銓管之司。允洽簪纓之望。昔年掌貢。搜海嶽而皆空。今日掄材。酌淄澠而不混。

清通所莅。淆亂必除。歷居六郡之峻資。終補三台之缺位。遠祈邇禱。匪夕伊朝。某早仰仙標。遙欽懿範。抃慰瞻望。不任下情。云云。

第二

伏以禮稱選士。實資秀孝之科。書貴知人。允屬銓衡之職。君命既將歷試。物情固得僉諧。而況侍郎雲鶴性情。天驥行止。璵窗近日。高批帝語於筆端。絳帳生風。妙選羣才於門下。泊湖湘察俗。灋洛尹都。便宜入秉化權。坐匡聖略。直以手能持滿。心切避榮。唯求勇退之謀。久阻急徵之詔。萬乘夢思於隱霧。四方渴望於爲霖。今者移黜陟之司。託清通之鑑。何假山濤之密啓。能遵李重之良箴。永期涇渭分流。必使輪轅適用。某每思玉昆金季。皆辱眷知。松茂竹苞。深敦交契。禱祝瞻戀。並同衆誠。伏惟云云。

宣歙裴虔餘尙書

伏承榮奉徵詔。將赴闕庭。伏惟感慶兼極。今者妖氛向息。聖運重興。諸葛亮之用兵。已非急務。叔孫通之制禮。方藉賢才。以尙書望積臯夔。政成宛句。三年察俗。以仁義爲先。四境懷恩。俾寇戎自戢。是得傅巖結夢。宣室飛書。黎庶傾心。莫遂攀轅之戀。君王聳耳。待聽曳履之聲。況乃親侍安輿。榮趨帝輦。行聆調鼎。永使建囊。豈獨關中又安。實爲天下幸甚。某久鄰仁境。深飽德風。抃慰瞻攀。不任誠懇。云云。

第二

特垂手筆榮函。兼示陳情表藁。捧尋無斂。欣賀有餘。且近者時風僅訛。無道多缺。事親則薄。奉己爲先。只

將奔競榮身。不以遠離介意。今睹尙書。遠辭徵詔。懇致奏章。敍向來爲國分憂。不矜茂績。請從此於家就養。實稟格言。況尙書若赴行朝。必登相位。而乃不親梅鼎。願奉板輿。是逃台袞之榮。唯戀斑衣之樂。永使李密之表。萬古齊名。仍令束皙之詩。千秋長價。有以見聿修令問。橫勵時流。豈唯上德之美譚。實乃中興之盛事。拜賀末由。但切攀依之至。云云。

鹽鐵李都相公

伏承榮膺寵命。兼掌漕運。伏惟感慰。伏以鑄山熬海。旣標富國之權。紫帳皂簪。固是安邦之彥。況從多事。諒託全才。相公中庸日彰。大任天降。舟楫暫妨於援溺。棟梁必俟於扶危。今者三年禮成。萬乘恩至。假途端揆。正位司元。憑孔僅之智謀。繼齊桓之霸業。必也廣施奇計。遍致豐資。答上帝之殊恩。振中興之盛事。凡云品彙。孰不欣歡。某每慙糠粃居前。久阻鹽梅入用。主張多失。固難稱老成人。交代叨榮。無以告新令尹。忭慰兢惕。不在下情。拜賀末由。攀戀空切。云云。

第二

每辱榮緘。卽垂虛譽。周顒齊名於樂廣。固是懷慚。韓非接傳於老聃。實爲過望。荷戴增切。兢惶益深。伏以相公宋劍倚天。魯戈駐日。再居重任。大洽羣情。必計海若傾心。廣閭煎熬之利。山靈效力。助成鎔鑄之功。便令流馬飛牛。終得踰千越萬。國用則立期饒羨。廟謨則坐致昇平。勤王之誠。在我而已。伏惟遵護。用慰禱祠。其他下誠。已具前狀。云云。

盧紹給事

近睹除書。恭承賢兄左承榮膺寵命。伏惟感慰。竊以國有司直野無遺賢。蓋前代之所難。實我朝之獨盛。況乃上可以紂彈八座。下可整肅百官。永言其才。固屬全德。賢兄左承中庸處厚。大雅含清。拄晴空而嶽頂無雲。瑩秋色而潭心有月。是得歷游華貫。輝綽令猷。頃遇分憂。暫作甘棠太守。尋聆徵詔。請爲仙桂主人。此時也。歡聲則風振儒林。喜氣則雲鋪筆陣。有口皆賀。無心不歸。蓬島靈珠。想離領下。荆山瑞玉。待入掌中。而屬鷺谷藏春。鳳城陷寇。不見孔門盛事。唯傷魏闕餘災。今者遠從行朝。久臨憲府。旣躡清資於侍極。榮升重位於肅機。傳咸之畏愼。無虧鄭晉之矜莊。有裕正當今日。必繼芳塵。給事避地經時。陟岡勞念。今聆美拜。稍慰遠思。然每於絳帳馳心。共懷遺恨。須到洪鈞入手。方洽羣情。高接雁行。佇迎鳳詔。虔禱瞻戀。無以披陳。云云。

壁州鄭凝績尙書

伏承自小司馬假大宗伯。出刺始寧。伏惟慶慰。竊以進有致君之志。共託阿衡。仕無擇祿之言。常聆季路綽然遺範。宛若合符。尙書玉樹一枝。金山萬仞。雅望全騰於八海。華資緩步於五雲。漢丞相之傳經。永光儒室。周司徒之善職。固屬高門。況乃於國於家。曰忠曰孝。比者黃巾犯闕。翠輦省方。尙書暫別鯉庭。遠趨鳳辰。高提夢筆。仰贊宸猷。稟大聖之指歸。立中朝之張本。此實爲人臣之忠於國也。今以聖主優賢。嚴君遜位。尙書固辭武部。峻陟儀曹。榮掛萊衣。俾歌廉袴。毛義之喜難自己。胡威之清必衆知。又爲人子之孝。

於家也。莫不事標雙美。譽冠一時。今彼郡而昔彼州。豈能較盛。出傳舍而入官舍。未足齊榮。佇見風扇揚名。雲屏隔位。隼旗高建。免勞陟謁之詩。龍鼎待調。卽展濟川之業。某早銜眷獎。常切禱祠。拜賀未期。瞻攀無極。云云。

泗川鄭庾常侍

伏承已到貴鎮。上訖伏惟感慰。昔鄭宏爲臨淮太守。熊初架軾。鹿乃挾轡。旣傳一郡之政聲。終陟三公之寵秩。果符瑞應。永振美譚。今則常侍族茂山東。威臨泗上。實繼巨君之芳跡。足分聖上之遠憂。況乃沛帥戢兵。淮民復業。懸一城之愛日。振四境之和風。羣情允諧。新命非遠。某近封斯接。殊眷先垂。抃慰瞻攀。但切誠抱。云云。

湖州杜孺休常侍

昨睹除書。伏承榮膺寵命。再理吳興。伏惟感慰。常侍比臨雪水。大振袁風。適聆高握新蘭。又見重分舊竹。實謂政聲日洽。人欲天從。徵黃太守之書。卻隨鳳去。借寇使君之衆。迎得春來。自此煙封茗畦。月挂蘋渚。不詠洞庭歸客。卽吟金谷主人。再樂三年。終蘇一境。然後入居青瑣。坐演紫泥。福庶品而旣多。掌陶鈞而不晚。某早銜殊眷。抃慰實深。拜賀未由。瞻馳倍切。云云。

